

摘藻堂四庫全書薈要

史部

欽定四庫全書舊要卷六千七百八史部

明史卷一百十五

大學士張廷玉等奉 敕修

列傳第三

興宗孝康皇帝

孝康皇后  
呂太后

睿宗獻皇帝

獻皇后

興宗孝康皇帝標太祖長子也母高皇后元至正十五年生於太平陳廸家太祖為吳王立為王世子從宋濂受經吳元年年十三矣命省臨濠墓諭曰商高宗舊勞

於外周成王早聞無逸之訓皆知小民疾苦故在位勤  
儉為守成令主兒生長富貴習于宴安今出旁近郡縣  
遊覽山川經歷田野其因道途險易以知鞍馬勤勞觀  
閭閻生業以知衣食艱難察民情好惡以知風俗美惡  
即祖宗所居訪求父老問吾起兵渡江時事識之于心  
以知吾創業不易又命中書省擇官輔行凡所過郡邑  
城隍山川之神皆祭以少牢過太平訪廸家賜白金五  
十兩至泗濠告祭諸祖墓是冬從太祖觀郊壇令左右

導之農家徧觀服食器具又指道旁荆楚曰古用此為  
扑刑以其能去風雖傷不殺人古人用心仁厚如此兒  
念之洪武元年正月立為皇太子帶刀舍人周宗上書  
乞教太子帝嘉納中書省都督府請倣元制以太子為  
中書令帝以元制不足法令詹同考歷代東宮官制選  
勲德老成及新進賢者兼領東宮官于是左丞相李善  
長兼太子少師右丞相徐達兼太子太傅中書平章錄  
軍國重事常遇春兼太子少保右都督馮宗異兼右詹

事中書平章政事胡廷瑞廖永忠李伯昇兼同知大都院事中書左右丞趙庸王溥兼副詹事中書參政楊憲兼詹事丞傅瓛兼詹事同知大都督康茂才張興祖兼左右率府使大都督副使顧時孫興祖等同知左右率府事僉大都督府事吳楨耿炳文兼左右率府副使御史大夫鄧愈湯和兼諭德御史中丞劉基章溢兼贊善大夫治書侍御史文原吉范顥祖兼太子賓客諭之曰朕于東宮不別設府僚而以卿等兼領者蓋軍旅未息

朕若有事於外必太子監國若設府僚卿等在內事當  
啟聞太子或聽斷不明與卿等意見不合卿等必謂府  
僚導之嫌隙易生又所以特置賓客諭德等官者欲輔  
成太子德性且選名儒為之職此故也昔周公教成王  
克詰戎兵召公教康王張皇六師此居安慮危不忘武  
備蓋繼世之君生長富貴昵于安逸不諳軍旅一有緩  
急罔知所措二公之言其并識之是年命選國子生國  
琦王璞張傑等十餘人侍太子讀書禁中琦等八對謹

身殿儀狀明秀應對詳雅帝喜因謂殿中侍御史郭淵友等曰諸生于文藝習矣然與太子處當端其心術不流浮靡庶儲德亦獲裨助因厚賜之未幾以梁貞王儀為太子賓客秦庸盧德明張昌為太子諭德先是建大本堂取古今圖籍充其中徵四方名儒教太子諸王分番夜直選才俊之士充伴讀帝時時賜宴賦詩商榷古今評論文字無虛日命諸儒作鍾山龍蟠賦置酒歡甚自作時雪賦賜東宮官令三師諭德朝賀東宮東宮答

拜又命東宮及王府官編輯古人行事可為鑒戒者訓諭太子諸王四年春製大本堂玉圖記賜太子十年令自今政事並啓太子處分然後奏聞諭曰自古創業之君歷涉勤勞達人情周物理故處事咸當守成之君生長富貴若非平昔練達少有不謬者故吾特命爾日臨羣臣聽斷諸司啓事以練習國政惟仁不失於疎暴惟明不惑於邪佞惟勤不溺于安逸惟斷不牽于文法凡此皆心為權度吾自有天下以來未嘗暇逸于諸事務



惟恐毫髮失當以負上天付託之意戴星而朝夜分而  
寢爾所親見爾能體而行之天下之福也時公儒臣為  
太子講大學衍義二十二年置詹事院二十四年八月  
敕太子巡撫陝西先是帝以應天開封為南北京臨濠  
為中都御史胡子祺上書曰天下形勝地可都者四河  
東地勢高控制西北堯嘗都之然其地苦寒汴梁襟帶  
河淮宋嘗都之然其地平曠無險可憑洛陽周公卜之  
周漢遷之然嵩邱非有殺函終南之阻澗瀍伊洛非有

涇渭灞澇之雄夫據百二河山之勝可以聳諸侯之望  
舉天下莫關中若也帝稱善至是論太子曰天下山川  
惟秦地號為險固汝往以省觀風俗慰勞秦父老子弟  
於是擇文武諸臣扈太子行既行使論曰爾昨渡江震  
雷忽起于東南導爾前行是威震之兆也然一旬久陰  
不雨占有陰謀宜慎舉動嚴宿衛施仁布惠以回天意  
仍申諭從行諸臣以宿頓聞比還獻陝西地圖遂病病  
中上言經畧建都事明年四月丙子薨帝慟哭禮官議

期喪請以日易及當除服帝不忍禮官請之始釋服視朝八月庚申祔葬孝陵東謚曰懿文太子為人友愛泰周諸王數有過輒調護之得返國有告晉王異謀者太子涕泣為請帝乃感悟帝初撫兄子文正姊子李文忠及沐英等為子高后視如己出帝或以事督過之太子輒告高后為慰解其仁慈天性然也太子元妃常氏繼妃呂氏生子五長雄英次建文皇帝次允熲次允樞次允熙建文元年追尊為孝康皇帝廟號興宗燕王即帝

位復稱懿文皇太子孝康皇后常氏開平王遇春女洪武四年四月冊為皇太子妃十一年十一月薨謚敬懿太祖為輟朝三日建文元年追尊為孝康皇后永樂元年復稱敬懿皇太子妃皇太后呂氏壽州人父本累官太常卿惠帝即位尊為皇太后燕兵至金川門迓太后至軍中述不得已起兵之故太后還未至宮中已火既而隨其子允熙居懿文陵永樂元年復稱皇嫂懿文太子妃初太祖冊常妃繼冊呂妃常氏薨呂氏始獨居東

宮而其時秦王榘亦納王保保妹為妃又以鄧愈女為配皆前代故事所無也

睿宗興獻皇帝祐杭憲宗第四子母邵貴妃成化二十三年封興王弘治四年建邸德安己改安陸七年之藩舟次龍江有慈烏數萬繞舟至黃州復然人以為瑞謝疏陳五事孝宗嘉之賜予異諸王弟嗜詩書絕珍玩不畜女樂非公宴不設牲醴楚俗尚巫覡而輕醫藥乃選布良方設藥餌以濟病者長史張景明獻所著六益于

王賜之金帛曰吾以此懸宮門矣邨旁有臺曰陽春數  
與羣臣賓從登臨賦詩正德十四年薨謚曰獻王薨二  
年而武宗崩召王世子入嗣大統是為世宗禮臣毛澄  
等援漢定陶宋濮王故事考孝宗改稱王為皇叔父興  
獻大王妃為皇叔母帝命廷臣集議未決進士則張璉  
上書請考興獻王帝大悅會母妃至自安陸止通州不  
入帝啓張太后欲避天子位奉母妃歸藩羣臣惶懼太  
后命進王為興獻帝妃為興國后璉更為大禮或問以

進而主事霍韜桂萼給事中熊浹議與璵合帝因諭輔  
臣楊廷和蔣冕毛紀帝后加稱皇廷和等合廷臣爭之  
未決嘉靖元年禁中火廷和及給事中鄧繼曾朱鳴陽  
引五行五事為廢禮之證乃輟稱皇加稱本生父興獻  
帝尊園曰陵黃屋監衛如制設祠署安陸歲時享祀用  
十二籩豆樂用八佾帝心終未懃三年加稱為本生皇  
考恭穆獻皇帝興國太后為本生母章聖皇太后建廟  
奉先殿西曰觀德殿祭如太廟七月諭去本生號九月

詔稱孝宗皇伯考稱獻皇帝曰皇考璵等既驟貴干  
進者爭以言禮希上意百戶隨全錄事錢子勳言獻皇  
帝宜遷葬天壽山禮部尚書席書議高皇帝不遷祖陵  
太宗不遷孝陵蓋其慎也小臣妄議山陵宜罪工部尚  
書趙璜亦言不可乃止尊陵名曰顯陵明年修獻皇帝  
實錄建世廟于太廟左六年以觀德殿狹隘改建崇先  
殿七年命璵等集明倫大典成加上尊謚曰恭睿淵仁  
寬穆純聖獻皇帝親製顯陵碑封松林山為純德山從



祝方澤次五鎮改安陸州為承天府十七年通州同知  
豐坊請加尊皇考廟稱宗以配上帝九月又加上尊謚  
知天守道洪德淵仁寬穆純聖恭儉敬文獻皇帝廟號  
睿宗祔太廟位次武宗上明堂大享奉主配天罷世廟  
之祭四十四年芝生世廟柱復作玉芝宮祀焉穆宗立  
乃罷明堂配享初楊廷和等議封益王次子崇仁王厚  
炫為興王奉獻帝祀不允興國封除獻帝有長子厚熙  
生五日而殤嘉靖四年贈岳王謚曰懷獻皇后蔣氏世

宗母也父敷大興人追封玉田伯弘治五年冊為興王妃世宗入承大統即位三日遣使詣安陸奉迎而令廷臣議推尊禮咸謂宜考孝宗而稱興王為皇叔父妃為皇叔母議三上未決會妃將至禮臣上入宮儀由崇文門入東安門皇帝迎于東華門不許再議由正陽門入大明承天端門從王門入宮又不許王門諸王所出入門也敕曰聖母至御太后車服從御道入朝太廟故事后妃無謁廟禮禮臣難之時妃至通州聞考孝宗恚曰

安得以吾子為他人子留不進帝涕泣願避位羣臣以  
慈壽太后命改稱興獻后乃入以太后儀謁奉先奉慈  
二殿不廟見元年改稱興國太后三年乃上尊號曰本  
生章聖皇太后是年秋用張璪等言尊為聖母章聖皇  
太后五年獻帝世廟成奉太后八謁七年上尊號曰慈  
仁九年頒太后所製女訓于天下十五年奉太后謁天  
壽山陵命諸臣進賀行殿是年加上尊號曰康靜貞壽  
十七年十二年崩諭禮工二部將改葬獻皇帝于大峪

山以駙馬都尉京山侯崔元為奉迎行禮使兵部尚書張瓚為禮儀護行使指揮趙俊為吉凶儀仗官翊國公郭勛知聖母山陵事已帝親幸大峪相視令議奉太后南詣合葬而禮部尚書嚴嵩等言靈駕北來慈宮南詣共一舉耳大峪可朝發夕至顯陵遠在承天恐陛下春秋念之臣謂如初議便帝曰成祖豈不思皇祖耶何以南孝陵因止崔元等毋行而令趙俊往且啟視壙宮是年上尊謚曰慈孝貞順仁敬誠一安天誕聖獻皇后明

年俊歸謂顯陵不吉遂議南巡九卿大臣許讚等諫不聽左都御史王廷相又諫帝曰朕豈空行哉為吾母耳已而侍御呂柟給事中曾烜御史劉賢郎中岳倫等復相繼疏諫不聽三月帝至承天謁顯陵作新宮焉曰侍合葬也歸過慶都御史謝少南言慶都有堯母墓佚于祀典請祀之帝曰帝堯父母異陵可知合葬非古即拜少南左春坊左司直兼翰林院檢討定議葬大峪山四月帝謁長陵諭嚴嵩曰大峪不如純德仍命崔元護梓

宮南祔七月合塋顯陵主祔睿宗廟

贊曰興宗睿宗雖未嘗身為天子而尊號徽稱典禮具備其實有不容泯者史者所以記事也記事必核其名與實曰宗曰帝者當時已定之名名定而實著焉矣爰據元史裕宗睿宗列傳之例別為一卷如右而各以後附焉

明史卷一百十五



總校官編修臣吳紹深



欽定四庫全書叢要

史部  
明史卷一百七十六



詳校官員外郎臣楊世綸

欽定四庫全書薈要卷六千七百九 史部

明史卷一百十六

大學士張廷玉等奉 敕修

傳第四

諸王

明制皇子封親王授金冊金寶歲祿萬石府置官屬護衛甲士少者三千人多者至萬九千人隸籍兵部冕服車旗邸第下天子一等公侯大臣伏而拜謁無敢鈞禮

親王嫡長子年及十歲則授金冊金寶立為王世子長

孫立為世孫冠服視一品諸子年十歲則授塗金銀冊

銀寶封為郡王嫡長子為郡王世子嫡長孫則授長孫

冠服視二品諸子授鎮國將軍孫輔國將軍曾孫奉國

將軍四世孫鎮國中尉五世孫輔國中尉六世以下皆

奉國中尉其生也請名其長也請婚祿之終身喪葬予

費親親之誼篤矣考二百餘年之間宗姓實繁賢愚雜

出今據所紀載自太祖追封祔廟十五王以及夫列朝

所封者著於篇而郡王以下有行義事實可採者世系亦得附見焉

諸王一

宗室十五王

太祖諸子一

秦王棧 汧陽王誠冽

晉王桐 慶成王濟炫  
西河王奇溯

新璫

周王櫛 鎮平王有熿  
博平王安滅  
南陵王睦  
鎮國中尉睦擘  
鎮國將軍安汎

鎮國中尉勤熨

楚王楨

武岡王顯槐

齊王搏

潭王梓

趙王杞

魯王檀

歸善王當返

輔國將軍當濟

奉國將

熙祖二子長仁祖次壽春王俱王太后生壽春王四子

長霍邱王次下蔡王次安豐王次蒙城王霍邱王一子

寶應王安豐王四子六安王來安王都梁王英山王下

蔡蒙城及寶應六安諸王先卒皆無後洪武元年追封

二年定從祀禮祔享祖廟東西廡壽春霍邱安豐蒙城  
四王皆以王妃配食蒙城王妃田氏早寡有節行太祖  
甚重之十王四妃墓存鳳陽白塔祠官歲祀焉

仁祖四子長南昌王次盱眙王次臨淮王次太祖俱陳  
太后生南昌王二子長山陽王無後次文正盱眙王一  
子昭信王無後臨淮王無子太祖起兵時諸王皆前卒  
獨文正在洪武初諸王皆追封從祀文正以罪謫死子  
守謙封靖江王自有傳正德十一年御史徐文華言宋

儒程頤曰成人而無後者祭終兄弟之孫之身蓋從祖而祔亦從祖而毀未有祖祧而祔食之孫獨存者今懿僖二祖既祧太廟祔享諸王亦宜罷祀廷議不可文華竟以妄言下獄嘉靖中建九廟東西廡如故九廟災復同堂異室之制祔十五王於兩序盱眙臨淮王二妃配食南昌王妃王氏後薨祔葬皇陵不配食

太祖二十六子高皇后生太子標秦王榘晉王桐成祖周王橚胡充妃生楚王楨達定妃生齊王榑潭王梓郭

寧妃生魯王檀郭惠妃生蜀王椿代王桂谷王穗胡順  
妃生湘王柏韓妃生遼王植余妃生慶王璠楊妃生寧  
王權周妃生岷王榘韓王松趙貴妃生瀋王模李賢妃  
生唐王桢劉惠妃生郢王棟葛麗妃生伊王樸而肅王  
榘母却無名號趙王妃安王楹皇子楠皆未詳所生母  
秦愍王榘太祖第二子洪武三年封十一年就藩西安  
其年五月賜璽書曰關內之民自元氏失政不勝其敝  
今吾定天下又有轉輸之勞民未休息爾之國若宮室



已完其不急之務悉已之十五年八月高皇后崩與晉  
燕諸王奔喪京師十月還國十七年皇后大祥復來朝  
尋遣還二十二年改太宗正院為宗人府以棧為宗人  
令二十四年以棧多過失召還京師令皇太子巡視闕  
陝太子還為之解明年命歸藩二十八年正月命帥平  
羌將軍甯正征叛番於洮州番懼而降帝悅賚予甚厚  
其年三月薨賜謚冊曰哀痛者父子之情追謚者天下  
之公朕封建諸子以爾年長首封於秦期永綏祿位以

藩屏帝室夫何不良於德竟殞厥身其謚曰愍挾妃元  
河南王王保保女弟次寧河王鄧愈女挾既薨王妃殉  
子隱王尚炳嗣沔人高福興等為亂尚炳巡邊境上捕  
盜永樂九年使者至西安尚炳稱疾不出迎見使者又  
傲慢帝逮治王府官吏賜尚炳書曰齊王拜胙遂以國  
霸晉侯情玉見譏無後王勉之尚炳懼來朝謝罪明年  
三月薨子僖王志垣嗣二十二年薨無子庶兄懷王志  
均由渭南王嗣宣德元年薨妃張氏未婚入宮守服弟

康王志潔嗣好古嗜學四年護衛軍張嵩等訐其府中  
事志潔不安辭三護衛宣宗答書獎諭予一護衛志潔  
顧數聽細人正統十年誣奏鎮守都御史陳鎰按問皆  
虛而審理正秦弘等又交章奏王凌辱府僚箠死軍役  
帝再以書戒飭之景泰六年薨子惠王公錫嗣以賢聞  
成化二十二年薨子簡王誠泳嗣性孝友恭謹嘗銘冠  
服以自警秦川多賜地軍民佃以為業供租稅歲歛輒  
蠲之長安有魯齋書院久廢故址平為民居誠泳別易

地建正學書院又旁建小學擇軍校子弟秀慧者延儒  
生教之親臨課試王府護衛得入學自誠泳始所著有  
經進小鳴集弘治十一年薨無子從弟臨潼王誠潔子  
昭王秉榘嗣十四年薨子定王惟焯嗣有賢行有司以  
聞嘉靖十九年敕表以綽楔獻金助太廟工益歲祿二  
百石賜玉帶襲衣惟焯嘗奏請潼關以西鳳翔以東河  
壩地曰皇祖所賜先臣挾也戶部尚書梁材執奏陝西  
外供三鎮內給四王民困已極豈得復奪壩地濫給宗

藩詔如材言二十三年薨無子再從子宣王懷塔由中尉嗣奏以本祿千石贍諸宗賜敕獎諭四十五年薨子靖王敬鎔嗣萬曆四年薨子敬王誼湮嗣十四年薨無子弟誼湮由紫陽王嗣薨子存樞嗣李自成破西安存樞降於賊偽授權將軍妃劉氏死之汧湯王誠冽康王諸孫也事父及繼母以孝聞父疾經月不解帶及薨醢醬鹽酪不入口明年墓生嘉禾一本雙穗嘉瓜二實並蒂慈烏異鳥環集以母馬妃早卒不逮養追服哀食蔬

者三年雪中萱草生華咸謂孝感所致弘治十五年賜  
敕嘉獎時有輔國將軍秉樺亦好學行篤父病禱於神  
乞以身代疾竟愈母喪廬墓有雙鶴集庭中定王以聞  
世宗表其門

晉恭王桐太祖第三子也學文於宋濂學書於杜環洪  
武三年封十一年就藩太原中道答膳夫帝馳諭曰吾  
帥羣英平禍亂不為姑息獨膳夫徐興祖事吾二十三  
年未嘗折辱怨不在大小子識之桐修目美髯顧盼有

威多智數然性驕在國多不法或告桐有異謀帝大怒

欲罪之太子力救得免二十四年太子巡陝西歸桐隨

來朝敕歸藩自是折節待官屬皆有禮更以恭慎聞是

時帝念邊防甚且欲諸子習兵事諸王封並塞居者皆

務軍務而晉燕二王尤被重寄數命將兵出塞及築城

屯田大將如宋國公馮勝潁國公傅友德皆受節制又

詔二王軍中事大者方以聞三十一年二月薨子定王

濟熈嗣永樂初帝以濟熈縱下黜其長史龍潭濟熈懼

欲上護衛不許弟平陽王濟煢幼很戾失愛於父及長  
太祖召秦晉燕周四世子及庶子之長者教於京師濟  
煢與燕王子高煦周王子有燭邪詭相比不為太祖所  
愛濟熿既嗣王成祖封濟煢平陽王濟煢追憾父并憾  
濟熿不為解嗾其弟慶成王濟炫等日訴濟熿過於朝  
又誘府中官校文致其罪歷年不已十五年帝奪濟熿  
爵及世子美圭皆為庶人俾守恭王園而立濟煢為晉  
王濟煢既立益橫暴至進毒弒嫡母謝氏逼祚恭王侍



兒吉祥幽濟熹父子蔬食不給父兄故侍從宮人多為所害莫敢言恭王宮中老媪走訴成祖乃即獄中召晉府故承奉左微問之盡得濟熿構濟熹狀立命微馳召濟熹父子濟熹幽空室已十年矣左微者故因濟熹牽連繫獄或傳微死已久及至一府大驚微入空室釋濟熹父子相抱持大慟時帝北征駐蹕沙城濟熹父子謁行在所帝見濟熹病惻然封美圭平陽王使奉父居平陽予以恭王故連伯灘田會帝崩濟熿遂不與美圭田

仁宗連以書諭卒不聽又聞朝廷賜濟熿王者冠服及他賚予益怨望成祖仁宗之崩不為服使寺人代臨幕中廣致妖巫為詛咒不報宣宗即位濟熿密遣人結高煦謀不軌寧化王濟煥告變比擒高煦又得濟熿交通書帝未之問也而濟熿所遣使高煦人懼罪及走京師首實內使劉信等數十人告濟熿擅取屯糧十萬餘石欲應高煦并發其宮中詛咒事濟煥亦至是始知嫡母被弒馳奏遣人察實召至京示以諸所發奸逆狀廢為

庶人幽鳳陽同謀官屬及諸巫悉論死時宣德二年四月也晉國絕封凡八年至英宗即位之二月乃進封美圭為晉王還居太原正統六年薨子莊王鍾鉉嗣弘治十五年薨世子竒源及其子表榮皆前卒表榮子端王知烺嗣知烺七歲而孤能盡哀居母喪嘔血芝生寢宮嘉靖十二年薨無子再從子簡王新埶嗣新化王表棟榮澤王表榘者端王諸父也表棟先卒子知燁嗣為新化王亦前卒二子新埶新塢端王請新埶嗣新化王未

封而端王薨表檄謀攝府事端王妃王氏曰王無後次及新化王新化父子卒有孫新垵在即召入府拜几筵為喪主表檄恣曰我尊行顧不得王上疏言新垵故新化王長子不得為人後新垵宜嗣新化王新塢宜嗣晉王禮部議新垵宜嗣是為簡王新垵母太妃尚氏嚴教子以禮太妃疾新垵叩頭露禱長史有敷陳輒拜受教其老也以弟鎮國將軍新塢子慎鏡攝藩事萬曆二年薨慎鏡亦卒弟惠王慎鋮嗣七年薨子穆王敏淳嗣三

十八年薨子求桂嗣李自成陷山西求桂與秦王存樞並為賊所執入北京不知所終慶成王濟炫晉恭王子其生也太祖方御慶成宴因以為封永樂元年徙居潞州坐擅發驛馬縱軍人為盜被責召還太原十年徙汾州薨謚莊惠曾孫端順王竒湏正德中以賢孝聞賜敕褒獎生子七十人嘉靖初尚書王瓊聞於朝嗣王表纘樸茂寡言孝友好文學嘉靖三十年壽八十詔書嘉獎賚以金幣輔國將軍竒添端順王弟也早卒夫人王氏

守節奉姑六十餘年世宗時以節孝旌又溫穆王曾孫  
中尉知煇病篤淑人賀氏欲先死以殉取瀕一勺咽之  
左右救奪遂絕食與知煇同時卒表藥以聞禮官因言  
會典無旌命婦例世宗特命旌之謚曰貞烈西河王竒  
溯定王曾孫三歲而孤問父所在即慟哭長刻旃檀為  
父順簡王像祀之母病渴中夜稽顙禱天俄有甘泉自  
地湧出母飲泉病良已及卒哀毀骨立子表相嗣亦以  
仁孝聞與寧河王表楠河東嗣王竒淮並為人所稱新

堞恭王七世孫家汾州崇禎十四年由宗貢生為中部知縣有事他邑土寇乘間陷其城坐免官已而復任署事者聞賊且至亟欲解印去新堞毅然曰此我致命之秋也即受之得賊所傳偽檄怒而碎之議拒守邑新遭寇無應者乃屬父老速去而已誓必死妻盧氏妾薛氏馮氏請先死許之有女數歲拊其背而勉之縊左右皆泣下乃書表封印使人馳送京師冠帶望闕拜又望拜其母遂自經士民葬之社壇側以妻女祔先是土寇薄

城縣丞光先與戰不勝自焚死新堞哭之慟為之誄曰  
殺身成仁雖死猶生至是新堞亦死難

周定王繡太祖第五子洪武三年封吳王七年有司請  
置護衛於杭州帝曰錢塘財賦地不可十一年改封周  
王命與燕楚齊三王駐鳳陽十四年就藩開封即宋故  
宮地為府二十二年繡棄其國來鳳陽帝怒將徙之雲  
南尋止使居京師世子有燬理藩事二十四年十二月  
敕歸藩建文初以繡燕王母弟頗疑悼之繡亦時有異



謀長史王翰數諫不納佯狂去櫛次子汝南王有燭告  
變帝使李景隆備邊道出汴猝圍王宮執櫛竄蒙化諸  
子並別徙已復召還京錮之成祖入南京復爵加祿五  
千石永樂元年正月詔歸其舊封獻頌九章及佾舞明  
年來朝獻騶虞帝悅宴賜甚厚以汴梁有河患將改封  
洛陽櫛言汴堤固無重勞民力乃止十四年疏辭所賜  
在城稅課十八年十月有告櫛反者帝察之有驗明年  
二月召至京示以所告詞櫛頓首謝死罪帝憐之不復

問楠歸國獻還三護衛仁宗即位加歲祿至二萬石楠  
好學能詞賦嘗作元宮詞百章以國土夷曠庶草蕃廡  
考核其可佐饑饉者四百餘種繪圖疏之名救荒本草  
闢東書堂以教世子長史劉淳為之師洪熙元年薨子  
憲王有燬嗣博學其弟有燬數訐有燬宣宗以書諭之  
有燬與弟有熿詐為祥符王有燬與趙王書繫箭上置  
彰德城外詞甚悖都指揮王友得書以聞宣宗逮友訊  
無跡召有燬至曰必有燬所為訊之具服並得有熿掠

食生人肝腦諸不法事於是並免為庶人有燬正統四年薨無子帝賜書有燬曰周王在日嘗奏身後務從儉約以省民力妃夫人以下不必從死年少有父母者遣歸既而妃鞏氏夫人施氏歐氏陳氏張氏韓氏李氏皆殉死詔謚妃貞烈六夫人貞順弟簡王有燬嗣景泰三年薨子靖王子屋嗣七年薨弟懿王子墜嗣成化二十一年薨子惠王同鏞嗣弘治十一年薨世子安橫未襲封而卒孫恭王睦樞嗣謚安橫悼王初安橫為世子與

弟平樂王安泛義寧王安浹爭漁利置囹圄刑具集亡  
賴為私人惠王戒安橫不從王怒安泛因而傾之安橫  
亦持安泛不法事惠王薨羣小交搆安橫奏安泛私壞  
社稷壇營私第安泛亦誣奏安橫諸陰事下鎮巡官按  
驗頃之安橫死其子睦樞立而幼安泛侵陵世子妃安  
浹亦訐妃出不正其子不可嗣十三年帝命太監魏忠  
刑部侍郎何鑑按治安泛懼益誣世子毒殺惠王並世  
子妃淫亂所連逮千人鑑等奏其妄廢安泛為庶人幽

鳳陽安溪亦革爵嘉靖十七年睦樞薨子勤熄先卒孫  
莊王朝垌嗣三十年薨子敬王在甓嗣萬曆十年薨子  
端王肅漆嗣薨子恭枵嗣崇禎十四年冬李自成攻開  
封恭枵出庫金五十萬餉守陴者懸賞格殪一賊予五  
十金賊穴城守者投以火賊被蒸死不可勝計乃解圍  
去明年正月帝下詔褒獎且加勞曰此高皇帝神靈憫  
宗室子孫維城莫固啟王心而降之福也其年四月自  
成再圍汴築長圍城中樵採路絕九月賊決河灌城城

圮恭枵從後山登城樓率宮妃及寧鄉安鄉永壽仁和  
諸王露棲雨中數日援軍駐河北以舟來迎始獲免事  
聞賜書慰勞並賜帑金文綺命寄居彰德汴城之陷也  
死者數十萬諸宗皆沒府中分器寶藏盡淪於巨浸踰  
年乃從水中得所奉高帝高后金容迎至彰德奉馬久  
之王薨贈謚未行國亡其孫南走死於廣州鎮平王有  
爚定王第八子嗜學工詩作道統論數萬言又採歷代  
公族賢者自夏五子迄元太子精吉木百餘人作賢王

傳若干卷博平王安洩惠王十三子惠王有子二十五人而安洩獨賢嘗輯貽後錄養正錄諸書勤於治生田園僮奴車馬甚具賓客造門傾已納之其時稱名德者必曰博平南陵王睦楨悼王第九子敏達有識嘉靖四十一年御史林潤言天下財賦歲供京師米四百萬石而各藩祿歲至八百五十三萬石山西河南存留米二百三十六萬三千石而宗室祿米五百四萬石即無災傷蠲免歲輸亦不足供祿米之半年復一年愈加蕃衍

勢窮弊極將何以支事下諸王議明年睦樛條上七議  
請立宗學以崇德教設科選以厲人才嚴保勘以杜冒  
濫革冗職以除素餐戒奔競以息饕貪制拜掃以廣孝  
思立憂制以省祿費詔下廷臣參酌之其後諸藩遂稍  
稍陳說利弊尚書李春芳集而上馬及頒宗藩條例多  
採睦樛議云鎮國中尉睦樛字灌甫鎮平王諸孫父奉  
國將軍安河以孝行聞於朝壘書旌賚既沒周王及宗  
室數百人請建祠詔賜祠額曰崇孝睦樛幼端穎郡人



李夢陽奇之及長被服儒素覃精經學從河洛間宿儒游年二十通五經尤邃於易春秋謂本朝經學一稟宋儒古人經解殘闕放失乃訪求海內通儒繕寫藏弃若李鼎祚易解張洽春秋傳皆叙而傳之呂柟嘗與論易歎服而去益訪購古書圖籍得江都葛氏章邱李氏書萬卷丹鉛歷然論者以方漢之劉向築室東陂延招學者通懷好士而內行修潔事親晨昏不離側喪三年居外舍有第五人親為教督盡推遺產與之萬曆五年舉

文行卓異為周藩宗正領宗學約宗生以三六九日午  
前講易詩書午後講春秋禮祀雖盛寒暑不輟所撰有  
五經稽疑六卷授經圖傳四卷韻譜五卷又作明帝世  
表周國世系表建文遜國褒忠錄河南通志開封郡志  
諸書巡撫御史褚鈇議稍減郡王以下歲祿均給貧宗  
帝遣給事中萬象春就周王議新會王睦棹號於衆曰  
裁祿之謀起於睦棹聚宗室千餘人擊之裂其衣冠上  
書抗詔帝怒廢睦棹為庶人睦棹屢疏引疾乞休詔勉

起之又三年卒年七十宗人頌功德者五百人詔賜輔國將軍禮葬之異數也學者稱為西亭先生時有將軍安泐者一歲喪母事其父以孝聞父病革刲臂為湯飲父父良已年七十追念母不逮養服哀廬墓三年詔旌其門素精名理聲譽大著人稱睦樗為大山安泐為小山云又勤熨者鎮國中尉也嘉靖中上書曰陛下躬上聖之資不法古帝王兢業萬幾擇政任人乃溺意長生屢修齋醮興作頻仍數年以來朝儀曠委任非人遂至

賄賂公行刑罰倒置奔競成風公私殫竭脫有意外變  
臣不知所終帝覽疏怒坐誹謗降庶人幽鳳陽子朝增  
已賜名以罪人子無敢為請封者上書請釋父罪且陳  
中興四事詔並禁錮穆宗立釋歸命有司與存恤

楚昭王楨太祖第六子始生時平武昌報適至太祖喜  
曰子長以楚封之洪武三年封楚王十四年就藩武昌  
嘗錄御註洪範及大寶箴置座右十八年四月銅鼓思  
州諸蠻亂命楨與信國公湯和江夏侯周德興帥師往

討和等分屯諸洞立柵與蠻人雜耕作久之擒其渠魁  
餘黨悉潰三十年古州蠻叛帝命楨帥師湘王栢為副  
往往征楨請餉三十萬又不親蒞軍帝詰責之命城銅鼓  
衛而還是年熒惑入太微詔諭楨戒慎楨書十事以自  
警未幾楨子巴陵王卒帝復與敕曰舊歲熒惑入太微  
太微天庭居翼軫楚分也五星無故入災必甚焉爾子  
疾逝恐災不止此尚省慎以回天意至冬王妃薨時初  
設宗人府以楨為右宗人永樂初進宗正二十二年薨

子莊王孟烷嗣敬慎好學宣德中平江伯陳瑄密奏湖  
廣東南大藩襟帶湖湘控引蠻越人民蕃庶商賈輻聚  
楚設三護衛自始封至今生齒日繁兵強國富小人行  
險或生邪心請選其精銳以轉漕為名俟至京師因而  
留之可無後患帝曰楚無過不可孟烷聞之懼五年上  
書請納兩護衛自留其一帝勞而聽之正統四年薨子  
憲王季垺嗣事母鄧妃至孝英宗賜書獎諭著東平河  
間圖贊為士林所誦八年薨弟康王季淑嗣天順六年

薨再從子靖王均鉞嗣正德五年薨子端王榮滅嗣以仁孝著稱武宗表曰彰孝之坊嘉靖十三年薨子愍王顯榕嗣居喪哀痛遇慶禮却賀端王壻儀賓沈寶與顯榕有隙使人誣奏顯榕左右呼顯榕萬歲且誘顯榕設水戲以習水軍世宗下其章撫臣具言顯榕居喪能守禮寶坐誣削為民顯榕妃吳氏生世子英燿性淫惡嘗丞顯榕宮人顯榕知之杖殺其所使陶元兒英燿又使卒劉金納妓宋么兒於別館顯榕欲罪金金遂誘英燿

謀為逆嘉靖二十四年正月十八日張燈置酒饗顯榕  
別宴顯榕弟武岡王顯槐於西室酒半金等從座後出  
以銅爪擊顯榕腦立斃顯槐驚救被傷奔免英耀徒顯  
榕屍宮中命長史孫立以中風報王從者朱貴抉門出  
告變撫按官以聞英耀懼具疏奏辨且逼崇陽王顯休  
為保奏通山王英炊不從直奏英耀弒逆狀詔遣中官  
及駙馬都尉鄔景和侍郎喻茂堅往訊英耀辭服詔逮  
入京是年九月告太廟伏誅焚屍揚灰悉誅其黨革顯



休祿十之三顯槐英炊皆賚金幣而以顯榕次子恭王  
英燦嗣隆慶五年薨子華奎幼萬曆八年始嗣爵衛官  
王守仁上告曰遠祖定遠侯弼楚王楨妃父也遺壞寶  
數十萬寄楚帑為嗣王侵匿詔遣中官清核華奎奏辨  
且請避宮搜掘皆不報久之繫鞫王府承奉等無所得  
時諸璫方以搜括希上意不欲暴守仁罪帝頗悟罷其  
事華奎乃奏上二萬金助三殿工三十一年楚宗人華  
越等言華奎與弟宣化王華璧皆非恭王子華奎乃恭

王妃兄王如言子抱養宮中華壁則王如縉家人王玉子也華越妻即如言女知之悉禮部尚書郭正域請行勘大學士沈一貫右華奎委撫按訊皆言偽王事無左驗而華越妻持其說甚堅不能決廷議令覆勘中旨以楚王襲封已二十餘年宜治華越等誣罔御史錢夢皋為一貫劾正域正域發華奎行賄一貫事華奎遂訟言正域主使正域罷去東安王英燧武岡王華增江夏王華璫等皆言偽跡昭著行賄有據諸宗人赴都投揭奉

旨切責罰祿削爵有差華越坐誣告降庶人錮鳳陽未  
幾華奎輸賄入都宗人遮奪之巡撫趙可懷屬有司捕  
治宗人蘊鈐等方恨可懷治楚獄不平遂大開歐可懷  
死巡按吳楷以楚叛告一貫擬發兵會勦命未下諸宗  
人悉就縛於是斬二人勒四人自盡錮高墻及禁間宅  
者復四十五人三十三年四月也自是無敢言楚事者  
久之禁錮諸人以恩詔得釋而華奎之真偽竟不白其  
後張獻忠掠湖廣華奎募卒自衛以張其在為帥獻忠

兵至武昌其在為內應執華奎沉之江諸宗無得免者  
武岡王顯槐端王第三子也嘉靖四十三年上書條藩  
政請設宗學擇立宗正宗表督課親郡王以下子弟十  
歲入學月餼米一石三載督學使者考績陟其中程式  
者全祿之五試不中課則黜之給以本祿三十二其庶  
人暨妻女月餼六石庶女勿加恩其後廷臣集議多采  
其意

齊王禕太祖第七子洪武三年封十五年就藩青州二

十三年命王帥護衛及山東徐邳諸軍從燕王北征二十四年復帥護衛騎士出開平時已令潁國公傅友德調發山東都司各衛軍出塞諭王遇敵當自為隊奏凱之時勿與諸將爭功博數歷塞上以武畧自喜然性凶暴多行不法建文初有告變者召至京廢為庶人與周王同禁錮燕兵入金川門急遣兵護二王二王卒不知所以大怖伏地哭已知之乃大喜成祖令王齊如故博益驕縱帝與書召來朝面諭王無忘患難時博不悛陰

畜刺客招異人術士為咒詛輒用護衛兵守青州城並  
城築苑牆斷往來守吏不得登城夜巡李拱曾名深等  
上急變搏拘匿以滅口永樂三年詔索拱諭搏改過是  
時周王橚亦中浮言上書謝罪帝封其書示搏明年五  
月來朝廷臣劾搏罪搏厲聲曰奸臣喋喋又欲效建文  
時耶會盡斬此輩帝聞之不懌留之京邸削官屬護衛  
誅指揮柴直等盡出搏繫囚及所造不法器械羣臣請  
罪教授葉垣等帝曰王性凶悖朕溫詔開諭至六七猶

不悟教授輩如王何垣等先自歸發其事可勿問搏既  
被留益有怨言是年八月召其子至京師並廢為庶人  
宣德三年福建妄男子樓濂詭稱七府小齊王謀不軌  
事覺械至京誅其黨數百人搏及三子皆暴卒幼子賢  
憐安置廬州景泰五年徙齊庶人谷庶人置南京敕守  
臣慎防後谷庶人絕齊庶人請得谷庶人第嘉靖十三  
年釋高墻庶人長鑿搏曾孫也萬曆中有承綵者亦搏  
裔齊宗人多凶狡獨承綵頗好學云

潭王梓太祖第八子洪武三年封十八年就藩長沙梓

英敏好學善屬文嘗召府中儒臣設醴賦詩親品其高  
下賚以金幣妃於氏都督顯女也顯子琥初為寧夏指  
揮二十三年坐胡惟庸黨顯與琥俱坐誅梓不自安帝  
遣使慰諭且召入見梓大懼與妃俱焚死無子除其封  
趙王杞太祖第九子洪武二年生次年受封明年殤

魯荒王檀太祖第十子洪武三年生兩月而封十八  
年就藩兗州好文禮士善詩歌餌金石藥毒發傷目帝



惡之二十二年薨謚曰荒子靖王肇輝甫彌月母妃湯  
信國公和女撫育教誨有度永樂元年三月始得嗣成  
祖愛重之車駕北巡過兗錫以詩幣宣德初上言國長  
史鄭昭紀善王貞奉職三十年矣宜以禮致其事帝謂  
蹇義曰皇祖稱王禮敬士不虛也許之成化二年薨以  
子惠王泰堪嗣九年薨子莊王陽鑄嗣嘉靖二年薨莊  
王在位久世子當從當從子健棧皆前卒健棧子端王  
觀煊嗣狎典膳秦信等遊戲無度挾娼樂裸男女雜坐

左右有忤者錐斧立斃或加以炮烙信等乘勢殘殺人  
館陶王當恣亦淫暴與觀焮交惡相訐奏帝念觀焮尚  
幼革其祿三之二逮誅信等亦革當恣祿三之一二十  
八年觀焮薨子恭王頤坦嗣有孝行捐邸中田湖贍貧  
民辭常祿給貧宗前後七賜璽書嘉勞萬厯二十二年  
薨世子壽鏘先卒弟敬王壽鎬嗣二十八年薨弟憲王  
壽鉉嗣崇禎九年薨弟肅王壽鏞嗣薨子以派嗣十五  
年

大清兵克兗州就執死弟以海轉徙台州張國維等迎  
居於紹興號魯監國

順治三年六月

大兵克紹興以海遁入海久之居金門鄭成功禮待頗  
恭既而懈以海不能平將往南澳成功使人沈之海中  
歸善王當洹莊王幼子也正德中賊攻兗州帥家衆乘  
城取護衛弓弩射却賊降敕獎諭遂以健武聞時有卒  
袁質與舍人趙巖俱家東平武斷為鄉人所惡吏部主

事梁穀亦東平人少不檢倚惡少為助既貴頗厭苦之  
又與千戶高乾有怨正德九年穀邑人西鳳竹屈昂誑  
穀云質巖且為亂穀心動因並指乾等告變於尚書楊  
一清兵部議以大兵駐濟南旬變先是當洹數與質巖  
校射至是當洹父莊王聽長史馬魁譖言當洹結質巖  
欲反雲禍及奏於朝帝遣司禮太監溫祥大理少卿王  
純錦衣衛指揮韓端往按問詳等至圍當洹第執之祥  
等讞穀所指皆平人魁懼事敗乃諷所厚陳環及術士

李秀佐證之復以書及賄抵鎮守太監畢真使逮二人詰問已而二人以實對書賄事亦為真所發於是御史李翰臣劾穀報怨邀功長史魁惑王罔奏宜即訊詔下翰臣獄謫廣德州判官免穀罪不問御史程啟充等疏言穀魁鼓煽流言死不赦罪縱首禍而謫言者非國體不報廷臣議當沔罪卒無所坐以藏護衛兵器違祖制廢為庶人戍質等于肅州所連逮多瘐死魁坐誣奏斬鳳竹昂流口外中官送當沔之高墻當沔大慟曰冤乎

觸墻死聞者傷之輔國將軍當濱鉅野王泰澄諸孫也  
慷慨有志節嘉靖三年上書請停郡縣主郡縣君卹典  
以蘇民困七年奏辭輔國將軍並子奉國將軍祿佐疏  
運河賜敕褒諭又上書言各藩郡縣主郡縣君先儀賓  
沒者故事儀賓得支半祿今因方災傷邊陲多事民窮  
財盡而各儀賓暴橫侈肆多不法請勿論品級減其月  
給明年又請以父子應得祿米佐振因勸帝法祖宗重  
國本裁不急之費息土木之工詞甚剴切帝嘉其意特

敕褒之不聽辭祿時東甌王健楸無子上書言宗室所以蕃由詐以媵子為嫡糜費縣官今臣無嫡嗣請以所受府第屯廩盡歸魯府待給新封者民財萬一乞著為例報可奉國將軍健根鉅野王陽鏊諸孫博通經術年七十猶縱談名理亶亶不倦嘉靖中詔褒其賢孝子鎮國中尉觀煇字中立居母喪蔬食逾年哀毀骨立嘗繪太平圖上獻世宗嘉獎之賜承訓書院名額並五經諸書弟觀韞以詩畫著名同時鉅野中尉頤塚安邱將軍

頤墉聲詩清拔樂陵王頤垓亦喜稱詩安邱王當遂靖  
王曾孫少孤事祖父母以孝聞曾孫頤堀好學秉禮尤  
諳練典故藩邸中有大疑輒就決一意韜晦監司守令  
希見其面年七十餘猶手不廢書魯府宗室壽鉞家兗  
州崇禎中為雲南通判有聲績永明王由榔在廣西以  
為右僉都御史使募兵值沙定州亂兵不能集孫可望  
兵至壽鉞知不免張麾蓋往見之行三揖禮曰謝將軍  
不殺不掠之恩可望脅之降不從繫他所使人誘以官



終不從從容題詩於壁或以詩報可望遂遇害

明史卷一百十六

欽定四庫全書

明史卷一百十六考證

晉恭王傳或告桐有異謀帝大怒欲罪之臣嚴福按

明實錄桐來朝時廢為庶人居京甚久號泣悔罪乃復爵敕歸時桂彥良汪河為其官屬桐待之有禮

數命將兵出塞及築城屯田臣嚴福按明實錄桐與

燕王同出塞燕王深入北庭桐第築城於下水太祖

切責之謹附考

周定王傳從河洛間宿儒游

臣嚴福按朱彝尊明詩

綜睦榑受禮於睢陽許先三月而盡其學謹附考

益購訪古書圖籍得江都葛氏章邱李氏書萬卷丹鉛

厯然 臣嚴福按朱彝尊明詩綜睦榑傾貲購書竭

四十年之力倣唐人四部法用牙籤識別凡一萬二千五百六十卷起萬卷堂諷誦其中築室東陂之上  
有陂上詩文集謹附考

楚昭王傳十四年就藩

臣嚴福按明實錄楚王於十

四年就藩即率江夏侯周德興討散毛諸洞蠻明年  
討大庸諸洞二十年討雲南阿魯速二十四年征西  
番二十七年討道州全州叛猺二十八年討桂陽山  
寇二十九年討瀘溪黔陽諸蠻並有功謹附考

明史卷一百十六考證

欽定四庫全書薈要卷六千七百十 史部

明史卷一百十七

大學士張廷玉等奉 敕修

列傳第五

諸王二

太祖諸子二

蜀王椿

湘王柏

代王桂

襄垣王遜燁

靈邱王遜烜

廷鄭

肅王楨

遼王植

慶王榘

寧王權

蜀獻王椿太祖第十一子洪武十一年封十七年命駐鳳陽二十三年就藩成都性孝友慈祥博綜典籍容止都雅帝嘗呼為蜀秀才在鳳陽時闢西堂延李叔荆蘓伯衡商榷文史既至蜀聘方孝孺為世子傅表其居曰正學以風蜀人詣講郡學知諸博士貧分祿餼之月一石後為定制造安車賜長史陳南賓聞義烏王紳賢聘

至待以客禮紳父禕死雲南往求遺骸資給之時諸王  
皆備邊練士卒椿獨以禮教守西陲番人入寇燒黑崖  
關椿請於朝遣都指揮瞿能隨涼國公藍玉出大波河  
邀擊之自是番人誓伏前代兩川之亂皆因內地不逞  
者鈎致為患有司私市蠻中物或需索啟爭端椿請緇  
錦香扇之屬從王邸定為常貢此外悉免宣索蜀人由  
此安業日益殷富川中二百年不被兵革椿力也成祖  
即位來朝賜予倍諸藩谷王穗椿母弟也圖不軌椿子



悅燿獲咎於椿走穗所穗稱為故建文君以詭衆永樂十四年椿暴其罪帝報曰王此舉周公安王室之心也入朝賚金銀繒綵鉅萬二十一年薨世子悅煥先卒孫靖王友堉嗣初華陽王悅燿謀奪嫡椿覺之會有他過杖之百將械於朝友堉為力請得釋椿之薨友堉方在京師悅燿竊王帑友堉歸不問悅燿更誣奏友堉怨誹成祖召入訊之會崩仁宗察其誣命歸藩召悅燿悅燿猶執奏仁宗抵其章於地遷之武岡復遷澧州宣德五

年總兵官陳懷奏都司私遺蜀邱礮用以警夜非制詔  
逮都司首領官明年獻還二護衛從之是年薨妃李侍  
姬黃皆自經以殉無子弟僖王友壘由羅江王嗣九年  
薨獻王第五子和王悅熨由保寧王嗣天順五年薨繼  
妃徐氏年二十六不食死諡靜節子定王友垓嗣七年  
薨子懷王申鉉嗣成化七年薨弟惠王申鑿嗣弘治六  
年薨子昭王賓瀚嗣正德三年薨子成王謙栩嗣自椿  
以下四世七王幾百五十年皆檢飭守禮法好學能文

孝宗恒稱蜀多賢王舉獻王家範為諸宗法讓栩尤賢

明喜儒雅不遜聲伎創義學修水利振災卹荒嘉靖十

五年巡撫都御史吳山巡按御史金粲以聞賜敕嘉獎

署坊表曰忠孝賢良二十年建太廟獻黃金六十斤白

金六百斤酬以玉帶幣帛二十六年薨子康王承燭嗣

三十七年薨子端王宣圻嗣萬曆四十年薨子恭王奉

銓嗣四十三年薨子至澍嗣宗禎末京師陷蜀尚無恙

未幾張獻忠陷成都合宗被害至澍率妃妾投於井

湘獻王栢太祖第十二子洪武十一年封十八年就藩  
荊州性嗜學讀書每至夜分開景元閣招納俊乂日事  
校讐志在經國喜談兵膂力過人善弓矢刀槊馳馬若  
飛三十年五月同楚王禎討古州蠻每出入縹囊載書  
以隨遇山水勝境輒徘徊終日尤善道家言自號紫虛  
子建文初有告栢反者帝遣使即訊栢懼無以自明闔  
宮焚死謚曰戾王無子封除永樂初改謚獻置詞官守  
其園

代簡王桂太祖第十三子洪武十一年封豫王二十五年改封代是年就藩大同糧餉艱遠令立衛屯田以省轉運明年詔帥護衛兵出塞受晉王節制桂性暴建文時以罪廢為庶人成祖即位復爵永樂元年正月還舊封十一月賜璽書曰聞弟縱戮取財國人甚苦告者數矣且王獨不記建文時耶尋命有司自今王府不得擅役軍民歛財物聽者治之已復有告其不軌者賜救列其三十二罪召入朝不至再召至中途遣還草其三護

衛及官屬王妃中山王徐達女仁孝文皇后妹也驕妒  
嘗漆桂二侍女為癩事聞帝以中山王故不罪桂移怒  
世子遜煇出其母子居外舍桂已老尚時時與諸子遜  
焯遜熿窄衣秃帽遊行市中袖錘斧傷人王府教授揚  
普上言遜焯狎軍人武亮與博戲致筮殺軍人朝廷杖  
治亮降敕責戒稍斂戢十六年四月復護衛及官屬正  
統十一年桂薨世子遜煇先卒孫隱王仕壘嗣景泰中  
嘗上言總兵官郭登守城功朝廷為勞登天順七年薨

子惠王成鍊嗣弘治二年薨子聰洙先封武邑王以肆

酒草爵已居惠王喪益淫酗廢為庶人遷太原久之惠

王妃為疏理復封武邑王卒子懿王俊杖襲封代王嘉

靖三年大同軍叛圍王宮俊杖走免事平賜書慰問六

年薨子昭王充燿嗣十二年大同軍又叛充燿走宣府

再賜慰問事平返國奏亂賊既除軍民交困乞遣大臣

振撫詔允行二十四年和川奉國將軍充灼坐罪奪祿

怨充燿不為解乃與襄垣中尉充焮謀引敵入大同殺

王會應州人羅廷璽等以白蓮教惑衆見充灼為妖言  
因畫策約奉小王子入塞藉其兵攻鴈門取平陽立充  
灼為主事定即計殺小王子充灼然之先遣人陰持火  
箭焚大同草場五六所而令通蒙古語者衛奉闌出邊  
為總兵周尚文邏卒所獲並得其所獻小王子表鞠實  
以聞逮充灼等至京賜死焚其屍王府長史等官皆逮  
治總督侍郎翁萬達疏言大同狹瘠祿餉不支代宗日  
繁衍衆聚而負且地近邊易生反側請量移和川昌化



諸郡王於山狹隙地詔改遷於山西先是景泰間昌化王仕璋乞移封景帝不許至是乃遷代宗自簡至懿封郡王者凡二十有三而外徙者十五二十六年充燿薨子恭王廷埼嗣饒陽王充焯數以事侵廷埼恐得罪乃以陳邊事為名三十一年奏鎮巡官之罪世宗為黜巡撫都御史何思逮總兵官徐仁等充焯益驕遂與廷埼互訐前後勛官莫能判巡撫都御史侯鉞奏奪其祿充焯怒不承三十三年詔遣司禮少監王臻即訊充焯乃

伏下法司錮高牆萬厯元年廷埼薨子定王鼎鉉嗣二十二年薨無子弟新寧王鼎鈞嗣薨子康王鼎渭嗣崇禎二年薨再傳至孫傳濟崇禎十七年三月李自成入大同閩門遇害襄垣王遜燁簡王第五子分封蒲州諸王就藩後非請命不得歲時定省遜燁念大同不置作思親篇詞甚悲切其後宗人聰灑聰洙俊權俊權俊嘒俊杓俊嘒充燁皆嫻於文章俊嘒字若訥尤博學有盛名不慕榮利姊陵川縣君適裴禹卿地震城崩禹卿死

縣君以首觸棺嘔血卒年二十有一詔謚貞節靈邱王

遜炗簡王第六子宣宗時封好學工詩尤善醫嘗施藥

治瘟疫全活無算子仕塲孫成鈺曾孫聰溥三王皆以

孝旌聰溥子俊格能文善書嘉靖時獻皇儲明堂二頌

興獻帝后挽歌賜金帛聰溥嘗乞封其孫廷址為曾長

孫禮官奏無故事帝以王壽考特許之已而復封廷址

子鼎鑪為元長孫聰溥薨年八十三鑪鑪襲高祖爵聰

溥之從父成鏞亦有孝行聰溥聞於朝賜金幣獎諭詔

禮官自今宗室中考行卓異如成鑑者撫按疏聞又成

鋹者隰川王諸孫父仕塏坐罪幽鳳陽病死成鋹微服  
走鳳陽視喪上疏自劾越禁乞負父骨歸葬澤州即不  
得願為庶人止墓側歲時省視詔許歸葬弟成鑑亦好

學有志槩嘉靖十三年上言雲中叛卒之變幸獲銷弭  
究其釁端實貪酷官吏激成之臣慮天下之禍隱於民  
心異日不獨雲中而已指陳切直帝下廷臣飭行時以  
其兄弟為二難焉萬曆二十年西夏弗寧山陰王俊柵

奏詩八章寓規風之旨代處塞上諸宗游經禍亂其言皆憂深思遠有中朝士大夫所不及者廷鄣代府宗室也崇禎中為鞏昌府通判署秦州事有廉直聲十六年冬賊陷秦州被執使之跪叱曰我天朝宗姓頭可斷膝不可屈賊欲活之大呼曰今日惟求一死坐自若遂見害

肅莊王楨太祖第十四子洪武十四年封漢王二十四年命偕衛谷慶寧岷五王練兵臨清明年改封肅又明

年詔之國以陝西各衛兵未集命駐平涼二十八年始就藩甘州詔王理陝西行都司甘州五衛軍務三十年令督軍屯糧遇征伐以長興侯耿炳文從建文元年乞內徙遂移蘭州永樂六年以捶殺衛卒三人及受哈密進馬逮其長史官屬已又聽百戶劉成言罪平涼衛軍器械成等京師十七年薨子康王瞻焯嗣宣德七年上二護衛府中被盜為榜募告捕者御史言非制罪其長史楊威瞻焯又請加歲祿敕曰洪武永樂間歲祿不過

五百石莊王不言者以朝廷念遠地轉輸難故也仁考

即位加五百石矣朕守祖制不敢違正統元年上言甘

州舊邸改都司而先王墳園尚在乞禁近邸樵採從之

天順三年上馬五百匹備邊子直不受帝強予之八年

薨子簡王祿埤嗣成化十五年薨子恭王貢錄嗣嘉靖

十五年薨世子真淞長孫弼桓皆早卒次孫定王弼光

嗣四十一年薨子縉炯先卒孫懷王紳堵嗣踰二年薨

無子靖王第四子弼柿子輔國將軍縉熾以屬近宜嗣

禮官言縉燾懷王從父不宜襲詔以本職理府事上冊

寶罷諸官屬穆宗即位定王妃吳氏及延長王真澆等

先後上言聖祖刈羣雄定天下報功之典有隆無替臣

祖莊王受封邊境操練征戍屏衛天家不幸太宗中絕

反拘於昭穆之次不及勲武繼絕之典非所以宗本支

厚藩衛也下部議議以郡王理藩政帝不許隆慶五年

特命縉燾嗣肅王設官屬之半萬曆十六年薨諡曰懿

子憲王紳堯嗣四十六年薨子識鋌嗣崇禎十六年冬



李自成破蘭州被執宗人皆死

遼簡王植太祖第十五子洪武十一年封衛王二十五年改封遼明年就藩廣寧以宮室未成暫駐大凌河北樹柵為營帝命武定侯郭英為築城郭宮室英王妃父也督工峻急會高麗自國中至鴨綠江皆積粟帝慮其有陰謀而役作軍士艱苦令輟役至三十年始命都督揚文督遼東諸衛士繕治之增其雉堞以嚴邊衛復圖西北沿邊要害示植與寧王權諭之曰自東勝以西至

寧夏河西察罕諾爾東勝以東至大同宣府開平又東  
南至大寧又東至遼東抵鴨綠江北至大漠又自鴈門  
關外西抵黃河渡河至察罕諾爾又東至紫荊關又東  
至居庸關及古北口又東至山海衛凡軍民屯種地毋  
縱畜牧其荒曠地及山場聽諸王駙馬牧放樵採東西  
往來營駐因以時練兵防寇遠者論之植在邊習軍旅  
屢樹軍功建文中北平兵起召植及寧王權還京植渡  
海歸朝改封荊州永樂元年入朝帝以植初貳於己媿

之十年削其護衛留軍校厨役三百人備使令二十二年薨子長陽王貴烱嗣初植庶子遠安王貴燮巴東王貴煊嘗告其父有異謀及父死又不奔喪仁宗即位皆廢為庶人正統元年府遠乞加王祿敕曰簡王得罪朝廷成祖特厚待仁宗朝加祿得支二千石宣宗又給旗軍三百人親親已至王素乖禮度府臣不匡正顧為王請乎不許三年巡撫侍郎吳政奏王不友諸弟待庶母寡恩捶死長史杜述居國多過召訊京師盡得其淫穢

黷倫兇暴諸不法事明年四月廢為庶人守簡王園弟

肅王貴煖嗣成化七年薨子靖王豪盛嗣十四年薨子

惠王恩鑑嗣弘治五年松滋王府諸宗人恩鑑等闖入

荊州府支歲祿恩鑑禁之皆怨已儀賓袁鏞復誘恩鑑

等招羣小奪軍民商賈利恩鑑發其事恩鑑等愈怨謀

殺王朝廷遣官按實幽恩鑑等鳳陽謫戍其黨有差恩

鑑陰使送者刑梏之斃八十餘人不數日世子暴卒八

年恩鑑疽發背薨子恭王寵授嗣與弟光澤王寵濼友

愛飲食服御必俱寵濼有令德寵沒有事必咨之後行  
正德十六年費子莊王致格嗣病不視事妃毛氏明書  
史沉毅有斷中外肅然賢聲聞天下嘉靖十六年致格  
薨子憲熾嗣以奉道為世宗所寵賜號清微忠教真人  
予金印隆慶元年御史陳省劾憲熾諸不法事詔奪真  
人號及印明年巡按御史部光先復劾其大罪十三命  
刑部侍郎洪朝選往勘具得其淫虐僭擬諸罪狀帝以  
憲熾宜誅念宗親免死廢為庶人錮高牆初副使施篤

臣憾憲熈甚朝選至湖廣篤臣詐為憲熈書餽朝選因  
劫持之憲熈建白肅曰訟寃之肅篤臣驚曰王反矣使  
卒五百圍王宮朝選還朝實王罪不言王反大學士張  
居正家荊州故與憲熈有隙媿朝選不坐憲熈反久之  
屬巡撫都御史勞堪羅織朝選死獄中其後居正死憲  
熈訟寃籍居正家而篤臣亦死遼國除諸宗隸楚藩以  
廣元王述堦為宗理

慶靖王梅太祖第十六子洪武二十四年封二十六年

就藩寧夏以餉未敷令駐慶陽北古韋州城就延安綏寧祖賦二十八年詔王理慶陽寧夏延安綏德諸衛軍務三十年始建邸王好學有文忠孝出天性成祖善之令歲一至韋州度夏宣德初言寧夏卑濕水泉惡乞仍居韋不許令歲一往來如成祖時正統初寧夏總兵官史昭奏王沮邊務占靈州草場畜牧遣使由綏德草地往還煽惑土民章未下或告王閱兵造戎器購天文書橐疑皆昭為之三年上書請徙國避昭英宗不可貽書

慰諭其年薨子康王秩燧嗣景泰元年以寧夏屢被兵  
乞徙內地不許成化五年薨子懷王邃璽嗣十五年薨  
弟莊王邃墀嗣弘治四年薨子恭王寘鏊嗣十一年薨  
子定王台滋嗣正德五年安化王寘鐸反台滋稽首行  
君臣禮詔削護衛革祿三之一戍其承奉長史嘉靖三  
年台滋賄鎮守太監李昕總兵官种勛求為奏請復祿  
昕勛不納台滋銜之會寧夏衛指揮楊欽等得罪於巡  
撫都御史張璿謀藉王殺璿及勛事覺下都司按察司



按治欽等誣台浚不軌璿以聞帝使太監扶安副都御  
史王時中等復按上言台浚他罪有之無謀不軌事詔  
廷臣定議坐前屈事寘鐫蒙恩不悛煽構羣小謀害守  
臣廢為庶人留邸歲與米三百石以其叔父鞏昌王寘  
釧攝府事寘釧裁慶邸宮妃薪米取邸中金帛萬計台  
浚子轟櫬幼失愛於父逃寘釧所寘釧造台浚謀逆謠  
語使寺人誘轟櫬吟誦圖陷台浚自立懷王妃王氏奏  
寘釧裁減衣食至不能自存豐林王台瀚亦欲陷寘釧

遂發其瀆亂人倫諸罪驗實廢為庶人幽高牆廷議謂

台滋父子乖離徙台滋西安而封彙櫛世子視府事十  
一年十月也十五年以兩宮徽號恩復台滋冠帶彙彙  
櫛先卒弟惠王彙枋嗣好學樂善以禮飭諸宗世宗賜  
之敕建坊表之寧夏築邊牆彙枋出銀米佐工萬曆二  
年彙子端王倪熿嗣十六年彙子憲王伸域嗣十九年  
彙明年寧夏賊巴拜反王妃方氏匿其子帥鉉地窖中  
自經死時壽陽嗣王倪爌巴拜脇降之不屈為所囚鎮

原王仲埏理府事謀襲賊弗克府中人皆被殺賊平御  
史劉芳譽言諸宗死節者俱應卹錄方妃宜建祠旌表  
詔從之給銀一萬五千兩分振諸宗人帥錡嗣薨子倬  
灌嗣崇禎十六年流賊破寧夏被執安塞王秩炅靖王  
季子也十二而孤母位氏誨之性通敏過日不忘善古  
文遇搢紳學士質難辨惑移日不倦所著有隨筆二十  
卷庶人寘鐸祖秩炅靖王第四子也封安化王父遼墁  
鎮國將軍以寘鐸襲王爵性狂誕相者言其當大貴巫

王九兒教鸚鵡妄言禍福寘鐻遂覲望非分寧夏指揮  
周昂千戶何錦丁廣衛諸學生孫景文孟彬史連輩皆  
往來寘鐻所正德五年帝遣大理少卿周東度寧夏屯  
田東希劉瑾意以五十畝為一頃又畝斂銀為瑾賄敲  
扑慘酷戍將衛卒皆憤怒而巡撫都御史安惟學數杖  
辱將士妻將士銜刺骨寘鐻知衆怒令景文飲諸武臣  
酒以言激之諸武臣多願從寘鐻者又令人結平鹵城  
戍將及素所厚張欽等會有邊警叅將仇鉞副總兵楊

英帥兵出防禦總兵官姜漢簡銳卒六十人為牙兵令周昂領之遂與何錦定約四月五日寘鐸設宴邀撫鎮官飲於第惟學東不至錦昂帥牙兵直入殺姜漢及太監李增鄧廣於坐分遣卒殺惟學東及都指揮楊忠於公署遂焚官府釋囚繫撒黃河渡船於西岸以絕渡者遣人招楊英仇鉞皆佯許之英率衆保王宏堡衆潰英奔靈州鉞引還寘鐸奪其軍出金帛犒將士偽署何錦大將軍周昂丁廣副將軍張欽先鋒魏鎮楊泰等總兵

都護令孫景文作檄以討劉瑾為名陝西總兵官曹雄  
聞變遣指揮黃正駐靈州檄楊英督靈州兵防黃河都  
指揮韓斌總兵官侯勲叅將時源各以兵會英密使蒼  
頭報仇鉞為內應令史墉浮渡奪西岸船營河東焚大  
小二壩草真鐻懼令錦等出禦獨留昂守城使使召鉞  
鉞稱病昂來問疾鉞刺昂死令親兵馳真鐻第擊殺景  
文連等十餘人遂擒真鐻迎英衆入真鐻反十有八日  
而擒錦廣泰欽先後皆獲械送伏誅真鐻賜死諸子弟

皆論死有孫彝材逃出削髮為僧居永寧山中未幾為  
土僧所凌詣官言狀傳至京安化宮人左寶瓶在浣衣  
局使驗之咤曰此彝材殿下也帝念其自歸免死安置  
鳳陽

寧獻王權太祖第十七子洪武二十四年封踰二年就  
藩大寧大寧在喜峯口外古會州地東連遼左西接宣  
府為巨鎮帶甲八萬草車六千所屬柔顏三衛騎兵皆  
驍勇善戰權數會諸王出塞以善謀稱燕王初起兵與

諸將議曰：「曩余巡塞上，見大寧諸軍慄悍，吾得大寧，斷  
遼東，取邊騎助戰，大事濟矣。」建文元年，朝議恐權與燕  
合，使人召權，權不至，坐削三護衛。其年九月，江陰侯吳  
高攻永平，燕王往救，高退。燕王遂自劉家口間道趨大  
寧，詭言窮蹙，來求救。權邀燕王單騎入城，執手大慟，具  
言不得已起兵，故求代草表謝罪。居數日，款洽不為備。  
北平銳卒伏城外，吏士稍稍入城，陰結三衛部長及諸  
戍卒，燕王辭去。權祖之郊，伏兵起，擁權行，三衛曠騎及



諸戍卒一呼畢集守將朱鑑不能禦戰歿王府妃妾世

子皆隨入松亭關歸北平大寧城為空權入燕軍時時

為燕王草檄燕王謂權事成當中分天下比即位王乞

改南土請蘇州曰畿內也請錢塘曰皇考以予五弟竟

不果建文無道以王其弟亦不克享建寧重慶荊州東

昌皆善地惟弟擇烏永樂元年二月改封南昌帝親製

詩送之詔即布政司為邸餽餼規制無所更已而人告

權巫蠱誹謗事密探無驗得已自是日齟齬搆精廬一

區鼓琴讀書其間終成祖世得無患仁宗時法禁稍解  
乃上書言南昌非其封國帝答書曰南昌叔父受之皇  
考已二十餘年非封國而何宣德三年請乞近郭灌城  
鄉土田明年又論宗室不應定品級帝怒頗有所詰責  
權上書謝過時年已老有司多齟齬以示威重權日與  
文學士相往還託志神舉自號臞仙嘗奉敕輯通鑑博  
論二卷又作家訓六篇寧國儀範七十四章漢唐祕史  
二卷史斷一卷文譜八卷詩譜一卷其他註纂數十種

正統十三年薨世子盤斌先卒孫靖王奠培嗣奠培善

文辭而性卞急多嫌猜景泰七年弟弋陽王奠璠許其

反逆巡撫韓雍以聞帝遣官往讞不實時軍民連逮者

六七百人會英宗復辟俱赦釋惟謫戍其教授游堅奠

培由是憾守土官不為禮布政使崔恭積不平王府事

多持不行奠培遂劾奏恭不法恭與按察使原傑亦奏

奠培私獻惠二王宮人通內官熊璧自盡按問皆實遂

奪護衛踰三年而奠璠以有罪賜死初錦衣衛指揮逢

杲聽訶事者言誣莫盭烝母帝令莫培具實以聞復遣

駙馬都尉薛桓與杲按問莫培奏無是事杲按亦無實

帝怒責問杲杲懼仍以爲實遂賜莫盭母子自盡焚其

屍是日雷雨大作平地水深數尺衆咸寃之弘治四年

莫培薨子康王覲鈞嗣十年薨子上高王宸濠嗣其母

故娼也始生靖王夢蛇啖其室旦日鷓鳴惡之及長輕

佻無威儀而善以文行自飾術士李自然李日芳妄言

具有異表又謂城東南有天子氣宸濠喜時時訶中朝

事聞謗言輒喜或言帝明聖朝廷治即怒武宗末年無  
子羣臣數請召宗室子子之宸濠屬疎顧深結左右於  
帝前稱其賢初宸濠賄劉瑾復所奪護衛瑾誅仍諭奪  
及陸完為兵部尚書宸濠結嬖人錢寧賊賢為內主欲  
奏復大學士費宏執不可諸嬖人乘宏讀廷試卷取中  
旨行之宸濠益恣擅殺都指揮戴宣逐政布司鄭岳御  
史范輅幽知府鄭嚙宗以方盡奪諸附王府民廬責民  
間子錢強奪田宅子女養羣盜劫財江湖間有司不敢

問日與致仕都御史李士實舉人劉養正等謀不軌副使胡世寧朝廷早裁抑之宸濠連奏世寧請罪世寧坐謫戊自是無敢言者正德十二年典儀閣順內官陳宣劉良問行詣闕上變寧賢等庇之不問宸濠疑出承奉周儀殺儀家及典仗查武等數百人巡撫都御史孫燧列其事中道為所邀不得達宸濠又賄錢寧求取中旨召其子司香太廟寧言於帝用異色龍牋加金報賜異色龍牋者故事所賜監國書牋也宸濠大喜列仗受賀

復勒諸生父老奏闕下稱其孝且勤時邊將江彬新得

幸太監張忠附彬欲頃寧賢乘間為帝言寧賢盛稱寧

王陛下以為何如帝曰薦文武百執事可任使也薦藩

王何為者忠曰賢稱寧王孝譏陛下不孝耳稱寧王勤

譏陛下不勤耳帝曰然下詔逐王府人毋留闕下是時

宸濠與士實養正日夜謀益遣姦人盧孔章等分布水

陸孔道萬里傳報浹徃返蹤跡大露朝野皆知其必

反巡撫都御史孫燧七上章言之皆為所邀沮諸權姦

多得宸濠金錢匿其事不以聞十四年御史蕭淮疏言  
宸濠諸罪謂不早制將來之患有不可勝言者疏下內  
閣大學士楊廷和謂宜如宣宗處趙府事遣勲戚大臣  
宣諭令王自新帝命駙馬都尉崖元都御史顏頤壽太  
監賴義持諭往收其護衛令還所奪官民田宸濠聞元  
等且至乃定計以己生辰日宴諸守土官詰旦皆入謝  
宸濠命甲士環之稱奉太后密旨令起兵入朝孫燧及  
副使許逵不從縛出斬之執御史王金主事馬司聰金



山叅議黃宏許傲廉布政使胡廉叅政陳杲劉棐僉事

賴鳳指揮許金白昂等下獄叅政王綸季敷僉事潘鵬

師變布政使梁宸按察使楊璋副使唐錦皆從逆以李

士實劉養正為左右丞相王綸為兵部尚書集兵號十

萬命其承奉涂欽與素所蓄羣盜閔念四等畧九江南

康破之馳檄指斥朝廷七月壬辰朔宸濠出江西留其

黨宜春王拱樛內官萬銳等守城自帥舟師蔽江下攻

安慶汀賴巡撫僉都御史王守仁聞變與吉安知府伍

文定等檄諸郡兵先後至乃使奉新知縣劉守緒破其

墳廠伏兵戊申直攻南昌辛亥城破拱掾銳等皆就擒

官人自焚死宸濠方攻安慶不克聞南昌破大恐解圍

還守仁逆擊之乙卯遇於黃家渡賊兵乘風進薄氣驕

甚文定及指揮余恩佯北誘賊趨利前後不相及知府

邢珣徐連戴德孺從後急擊文定還兵乘之賊潰斬溺

萬計又別遣知府陳槐林瑛曾璵周朝佐復九江南康

明日復戰官兵稍却文定帥士卒殊死鬪擒斬二千餘

級宸濠乃退保樵舍明日官軍以火攻之宸濠大敗諸妃嬪皆赴水死將士焚溺死者三萬餘人宸濠及其世子郡王儀賓並李士實劉養正涂欽王綸等俱就擒宸濠自舉事至敗蓋四十有三日時帝聞宸濠反下詔暴其罪告宗廟廢為庶人逮繫尚書陸完嬖人錢寧臧賢等籍其家江彬張忠從史帝親征至良鄉守仁捷奏至檄止之守仁已械繫宸濠等取道浙江帝留南京遣許泰朱暉及內臣張永張忠搜捕江西餘黨民不勝其擾

檄守仁還江西守仁至杭州遇張永以俘付之使送行

在十五年十二月帝受所獻俘回鑾至通州誅之封除

初宸濠謀逆其妃婁氏嘗諫及敗嘆曰昔紂用婦言亡

我以不用婦言亡悔何及嘉靖四年弋陽王拱橫等言

獻王惠王四服子孫所共祀非宸濠一人所自出如臣

等皆得甄別守職業如故而二王不獲廟享臣竊痛之

疏三上帝命弋陽王以郡王奉祀樂舞齋郎之屬半給

之寧藩既廢諸郡王勢頽頑莫能一帝命拱橫攝府事

卒樂安王拱樞攝拱樞奏以建安樂安弋陽三王分治  
八支著為令石城王奠堵惠王第四子性莊毅家法甚  
嚴靖王奠培與諸郡王交惡臨川弋陽皆被攝得罪奠  
堵獨謹約不能坐以過失子覲鎬孝友有令譽早卒孫  
宸倬嗣與母弟宸浦庶兄宸憫皆淫縱殺人弘治十二  
年互訐奏宸浮宸浦並革為庶人宸濫宸憫奪祿宸濫  
遂從宸濫反雷震死嘉靖二十四年復宸浮宸浦冠帶  
宸憫子拱挺上書為父深雪亦還爵宸濫弟宸湮素方

正宸濠欲屈之不得數使人火其居而諷諸宗資給之  
以示惠宸深辭不受宸濠敗宸深得免子輔國將軍拱  
槩孫奉國將軍多燿曾孫鎮國中尉謀埏三世皆端謹  
自好而謀帝尤貫串羣籍通曉朝廷典故諸王子孫好  
學敦行自周藩中尉睦榘而外莫及謀埏者萬厯二十  
二年廷議增設石城宜春管理命謀埏以中尉理石城  
王府事得劾治不法者典藩政三十年宗人咸就約束  
暇則閉戶讀書著易象通詩故春秋戴記魯論箋及他

書凡百十有二種皆手自繕寫黃汝亨為進賢令投謁  
抗禮劇談久之遂巡改席次日北面稱弟子人兩稱之  
病革有與諸子說易子八人皆賢而好學從弟謀晉築  
室龍沙躬耕賦詩以終奉國將軍拱樞瑞昌王奠埤四  
世孫也父宸渠為宸濠累逮繫中都兄拱柄請以身代  
拱樞佐之卒得白嘉靖九年上書請建宗學令宗室設  
壇埤行耕桑禮謹祀典加意恤刑皆得旨俞允捐田白  
鹿洞瞻學者其後以議禮稱旨拱柄上大禮頌並賜敕

褒諭諸子羣從多知名者多媪多燾以孝友著多燿多  
煇以秉禮嚴重稱多熾多燿多斫以善詞賦名而多媪  
與從兄多燧獨杜門却掃多購異書校讐以為樂萬厯  
中督撫薦理瑞昌王府事謝不起多燿父拱樛以宸濠  
事被逮多燿甫十餘齡哭走軍門乞以身代王守仁見  
而異之嘉靖二年疏訟父寃得釋歸復爵時諸郡王統  
於弋陽而瑞昌始王不祀多燿自謂小宗宜典宗祫請  
於朝特敕許焉乃益祭田修飭家政儼若朝典四子皆



莊謹嗜學奉國將軍多煌惠王第五子弋陽王奠璠五

世孫也考友嗜學弋陽五傳而絕宗人舉多煌賢能敕

攝府事瑞昌諸宗皆屬焉性廉靜寡欲淑人熊氏早卒

不再娶獨處齋閣者二十六年萬曆二十一年撫按以

行誼聞詔褒之會病卒詔守臣加祭一壇又多姪者亦

奉國將軍穎敏善詩歌嘗變姓名出遊蹤跡遍吳楚晚

病羸猶不廢吟誦卒門人私謚曰清敏先生子謀埤亦

有父風時樂安輔國將軍多燊有詩癖與謀埤等放志

文酒終其世

明史卷一百十七

欽定四庫全書

明史卷一百十七考證

自椿以下四世七王幾百五十年皆檢飭守禮法好學  
能文 臣嚴福按獻王椿有獻園集定王友垓有集  
十卷惠王申鑿有惠園集成王讓栩有長春競辰集  
端王宣圻有端園集一時諸王文學以蜀為冠見朱  
彝尊靜志居詩話謹附考

孫隱王仕壘 臣嚴福按隱王仕壘有叔八人並封郡

王天順五年以代隘徙封懷仁王於霍山陰襄垣二  
王於蒲靈邱王於絳宣寧隰川二王於隰并徙仕壘  
子定安王於忻見明實錄謹附考

乘宏讀廷試卷取中旨行之臣嚴福按完初為江西

按察使為宸濠所重完亦心附之自完入內與王問  
遺不絕王欲復護衛輦金分饋權要完知費宏不可  
遂因其讀卷入疏下制許之并傳旨令宏致仕見谷  
應泰明紀事本末謹附考

檄諸郡兵先後至  
臣嚴福按知府伍文定等至衆議

所向守仁曰兵家之道急衝其鋒攻其有備皆非計  
之得吾固示以自守不出之形彼必他出然後尾而  
圖之先復省城以搗其巢穴俟彼還兵來援然後邀  
而擊之此全勝之策也見王守仁陽明集及谷應泰  
明史紀事本末謹附考

明史卷一百十七考證



總校官編修臣吳紹深



欽定四庫全書薈要

史部  
明史卷一百二十八至  
二十

詳校官員外郎臣楊世綸



欽定四庫全書薈要卷六千七百十一 史部

明史卷一百十八

大學士張廷玉等奉 敕修

東列傳第六

王三

太祖諸子三

岷王梗

谷王穗

韓王松

瀋王模

沁水王埥塔  
清源王幼圻

安王楹

唐王楹

三城王芝琬  
文城王彌鉗

彌鉗

郢王棟

輔國將軍宇決

伊王奭

皇子楠

靖江王守謙

興宗諸子

虞王雄英

吳王允燿

衡王允燿

徐王允熾

惠帝諸子

太子文奎

少子文圭

成祖諸子

高煦

趙王高燧

高熾

岷莊王梗太祖第十八子洪武二十四年封國岷州二十八年以雲南新附宜親王鎮撫改雲南有司請營宮殿帝令暫居樓亭俟民力稍紓後作建文元年西平侯沐晟奏其過廢為庶人徙漳州永樂初復王與晟交惡

帝賜書諭梗而詔戒晟梗沉湎廢禮擅收諸司印信殺戮吏民帝怒奪冊寶尋念王建文中久幽繫復予之而梗不悛六年削其護衛罷官屬仁宗即位徙武岡寄居州治久之始建王邸景泰元年薨子恭王徽燦嗣初世子徽焮宣德初訐其弟鎮南王徽燦誹謗仁廟宣宗疑其詐並召至京及所連閹豎面質事果誣斬閹豎而遣徽燦等歸徽燦嗣位弟廣通王徽燂有勇力家人段友洪以技術得寵致仕後軍都事于利賓言徽燂有異相

當主天下遂謀亂作偽敕分遣友洪及蒙能陳添行入  
苗中誘諸苗以銀印金幣使發兵攻武岡苗首楊文伯  
等不敢受事覺友洪為徽燦所執都御史李實以聞遣  
駙馬都尉焦敬中官李琮徵徽燦入京師湖廣總督王  
來總兵官梁瑤復發陽宗王徽燧通謀狀亦徵入皆除  
爵幽高牆時景泰二年十月也天順七年徽燦薨子順  
王音堃嗣病瘋痺屢年不起次子安昌王膺鋪侍醫藥  
晨夕不去左右憲宗聞之賜敕嘉獎成化十六年音堃

薨世子膺鉅居喪飲博無度承奉劉忠禁制之遂殺忠  
事聞驗實革冠帶停封居四年乃嗣弘治十三年薨諡  
曰簡子靖王彥汰嗣嘉靖四年與弟南安王彥泥訐陰  
事彥泥廢為庶人彥汰亦坐抗制擅權革爵八年令世  
子譽榮攝府事譽榮上疏懇辭謂臣坐享尊榮而父困  
苦寂寞臣心何安且前曾舉臣弟善化王譽桔廷議以  
子無制父理奏寢不行臣亦人子也獨不愧臣弟乎帝  
覽疏憐之下部議十二年賜彥汰冠帶理府事十五年

以兩宮徽號恩復王又八年始薨子康王譽榮嗣三十一年薨子憲王定耀嗣三十四年薨曾孫洪禋天啓二年嗣崇禎元年薨無子從父企鰲嗣十六年流賊陷武岡遇害

谷王穗太祖第十九子洪武二十四年封二十八年三月就藩宣府宣府上谷地故曰谷王燕兵起穗走還京師及燕師渡江穗奉命守金川門登城望見成祖麾蓋開門迎降成祖德之即位賜穗樂七奏衛士三百賚予



甚厚改封長沙增歲祿二千石穗居國橫甚忠誠伯茹  
璋過長沙不謁穗穗白之帝璋得罪死遂益驕肆奪民  
田侵公稅殺無罪人長史虞廷綱數諫誣廷綱誹謗磔  
殺之招匿亡命習兵法戰陣造戰艦弓弩器械大創佛  
寺度僧千人為咒詛日與都指揮張成宦者吳智劉信  
謀呼成師尚父智信國老令公偽引讖書云我高皇帝  
十八子與讖合穗行次十九以趙王杞早卒故云謀於  
元夕獻燈選壯士教之音樂同入禁中伺隙為變又致

書蜀王為隱語欲結蜀為援蜀王貽書切責不聽已而

蜀王子崇寧王悅燻得罪逃穗所穗因詭衆往年我開  
金川門出建文君今在邨中我將為申大義事發有日  
矣蜀王聞之上變告初護衛都督僉事張興見穗為不  
法懼禍及因奏事北京白其狀帝不信興過南京復啓  
於太子且曰乞他日無連坐至是帝歎曰朕待穗厚張  
興常為朕言不忍信今果然立命中官持敕諭穗歸悅  
燻於蜀且召穗入朝穗至帝示以蜀王章伏地請死諸

大臣廷劾棣曰周戮管蔡漢辟潁長皆大義滅親陛下  
縱念棣奈天下何帝曰棣朕弟朕且令諸兄弟議永樂  
十五年正月周王橚楚王楨蜀王椿等各上議棣違祖  
訓謀不軌蹤跡甚著大逆不道誅無赦帝曰諸王羣臣  
奉大義國法固爾吾寧生棣於是及二子皆廢為庶人  
官屬多誅死與以先發不坐

韓憲王松太祖第二十子洪武二十四年封國開原性  
英敏通古今恭謹無過永樂五年薨以未之國命墓安

德門外十年子恭王冲焮嗣時棄大寧三衛地開原逼

塞不可居二十二年改封平涼仁宗即位召冲焮與弟

襄陵王冲焮樂平王冲焮入朝各獻詩頌帝嘉悅賜金

幣有差宣宗初請徙江南不許請蠲護衛屯租建邸第

許之遣主事毛俊經度並建襄陵樂平二邸及岷州廣

福寺陝西守臣言歲歛請輟工帝令繕王宮罷建寺役

平涼接邊徼間諜充斥冲焮習邊鄙利弊正統元年上

書極言邊事賜書褒答五年薨子懷王範圮嗣九年薨

弟靖王範邨嗣景泰元年薨子惠王徵針嗣初土木之

變冲炆赴京師勤王會解嚴下書慰勞及成化六年寇

入河套冲炆復請率子壻擊賊憲宗止之冲炆兄弟並

急王事以藩禁嚴不用自是宗臣無預兵事者成化五

年徵針薨子悼王偕流嗣十年薨弟康王偕灃嗣弘治

十四年薨子昭王旭樾嗣性忠孝工詩居藩有惠政韓

土瘠祿薄弟建寧王旭楅至以所受金冊質於宗室偕

洙事聞廢為庶人諸貧宗往往凌剗有司平涼知府吳

世良鄜衍任守德王松先後被窘辱嘉靖十三年旭樾

薨子定王融燧嗣懲宗室之橫頗繩以法不逞者怨之

三十二年襄陵王融焚及諸宗二百餘人訐奏王奸利

事勘無實革融焚等祿四十四年融燧薨子謨埏先卒

世宗末年以宗祿不足詔身不及王者許其嫡長子繼

王餘子如故秩謨埏以世子不及王王其長子朗錡餘

子止鎮國將軍萬厯三十四年朗錡薨謚曰端子孫皆

早卒曾孫亶塿嗣崇禎十六年賊陷平涼被執襄陵王

冲焯憲王第二子有至性母病刲股和藥病良已及卒  
終喪毀瘠每展墓必率子孫躬畚鍤培冢先後壘書褒  
美者六子範址服其教母荆罹危疾亦刲股進之愈其  
後五世同居門內雍肅嘉靖十一年賚以羊酒文幣韓  
諸王以襄陵家法為第一王孫徵鏡病卒聘杜氏女未  
婚歸王家志操甚厲詔賜旌表

藩簡王模太祖第二十一子洪武二十四年封永寧六  
年就藩潞州宣德六年薨子康王佶煊嗣景泰中數與

州官置酒大會巡撫朱鑑以聞帝令諸王非時令壽節  
不得輒與有司讌飲著為令天順元年薨子莊王幼墀  
嗣正德十一年薨子恭王銓鉦嗣嘉靖六年薨孫尤棖  
攝府事九年卒無子再從弟憲王允移攝府事凡十年  
乃嗣封當是時藩府諸郡王勛消詮錯並爭襲帝皆切  
責之而令允移嗣二十八年薨子宣王恬爇嗣好學工  
古文詞審聲律弟安慶王恬爇鎮康王恬焯穆宗時皆  
以孝義旌萬厯十年恬爇薨子定王程堯嗣仁孝恭慎



第六人封郡王者二餘例不得封朝廷獎王恭皆封郡王而不與祿薨子效鏞嗣明亡國除沁水王瑄塔簡王七世孫也工詩喜士名譽藉甚前此有德平王允挺負雋才與衡府新樂王載璽周宗人睦樛俊喙等齊名又清源王幼圻康王第三子博學能文詞其後輔國將軍勲連從子允杉允柠允析及鎮國將軍恬焮與諸子瑄圻等並以能詩名時稱瀟瀟多才焉

安惠王楹太祖第二十二子洪武二十四年封永樂六

年就藩平涼十五年薨無子封除府僚及樂戶悉罷留  
典仗校尉百人守園洪熙初韓恭王改封平涼就安王  
邸英宗令官校隸韓長史供安王祀暇日給韓王子襄  
陵王冲炆使令景泰五年冲炆遂乞承安王祀正德十  
二年嗣襄陵王徵鈐請樂戶祀安王明年樂平王徵鉷  
援徵鈐例以請禮部言親王有樂戶郡王別城居者有  
事假鼓吹於有司其附親王國者假樂戶於長史司因  
並革安王供祀樂戶嘉靖二年韓王旭樞復為伐請帝

以安王故報可之徵鈐卒韓王融燧令長史革之徵鈐  
長孫旭橦上言禮樂自天子出韓王不宜擅予奪融燧  
亦言親王郡王禮樂宜有降殺帝曰樂戶為安王祀也  
給如故

唐定王桎太祖第二十三子洪武二十四年封永樂六  
年就藩南陽十三年薨子靖王瓊炜嗣綜覈有矩矱為  
成祖所喜入朝五日三召見宣德元年薨妃高氏未冊  
自經以殉詔封靖王妃無子弟憲王瓊烜嗣成化十一

年薨于莊王芝址嗣諸弟三城王芝坵蕩陰王芝坵並  
好學有令譽而承休王芝垠憲王繼妃焦氏子也妃愛  
之遇節旦召樂婦入宮芝址詰之語不遜焦妃怒持鐵  
錘擊宮門芝址閉不敢出芝垠與妃弟璟誣王詈繼母  
按驗不實得芝垠慢母詈兄狀革爵久之始復二十一  
年芝址薨子成王彌錡嗣弘治中疏言朝廷待親藩生  
爵歿諡親親至矣間有惡未敗聞歿獲美諡是使善者  
怠惡者肆也自今宜勘實用寓彰瘴禮臣請降敕獎諭

勉厲諸王詔可武宗喜遊幸彌錡作憂國詩且上疏以  
用賢圖治為言弟文城王彌鉗有學行孝友篤至嘉靖  
二年彌錡薨無子彌鉗子敬王宇溫嗣二十一年獻金  
助太廟工賜玉帶益祿二百石時承休王芝垠子彌振  
以父與莊王交訐失令名折節蓋前愆宇溫上其事璽  
書褒獎三十九年宇溫薨子順王宙祿嗣四十三年薨  
子端王碩熿嗣感於嬖人囚世子器盛及其子聿鍵於  
承奉司器盛中毒死崇禎五年碩熿薨聿鍵嗣七年流

賊大熾蠲金築南陽城又援潞藩例乞增兵三千人不  
許九年秋八月京師戒嚴倡義勤王詔切責勒還國事  
定下部議廢為庶人幽之鳳陽弟聿鏞嗣十四年李自  
城陷南陽聿鏞遇害十七年京師陷福王由崧立於南  
京乃赦聿鏞出

大清順治二年五月南都降聿鏞行至杭遇鎮江總兵  
官鄭鴻逵戶部郎中蘇觀生遂奉入閩南安伯鄭芝龍  
巡撫都御史張肯堂與禮部尚書黃道周等定議奉王

稱監國閏六月丁未立於福州為號隆武改福州為天  
興府進芝龍鴻逵為侯封鄭芝豹鄭彩為伯觀生道周  
俱大學士肯堂為兵部尚書餘拜官有差聿鍵好學通  
典故然權在鄭氏不能有所為是年八月芝龍議簡戰  
守兵二千餘萬計餉不支其半請預借兩稅一年令羣  
下捐俸勸縉士輸助徵府縣銀穀未解者官吏督迫閭  
里騷然又廣開事例猶苦不足仙霞嶺守關兵僅數百  
人皆不堪用聿鍵屢促芝龍出兵輒以餉詘辭久之芝

龍知衆論不平乃請以鴻遠出浙東彩出江西各擁兵  
數千號數萬既行託候餉皆行百里而還先是黃道周  
知芝龍無意出師自請行從廣信趨婺源兵潰死事詳  
道周傳是時李自成兵敗走死通山其兄子李錦帥衆  
降於湖廣總督何騰蛟一時增兵十餘萬侍郎楊廷麟  
祭酒劉同升起兵復吉安臨江於是廷麟等請聿鍵出  
江右騰蛟請出湖南原任知州金堡言騰蛟可恃芝龍  
不可恃宜棄閩就楚聿鍵大喜授堡給事中遣觀生先



行募兵先是靖江王亨嘉僭稱監國不奉聿鍵命為巡撫瞿式耜等所擒以捷聞而魯王以海又稱監國於紹興拒聿鍵使者故聿鍵決意出江西湖廣十二月發福州駐建寧廣東布政湯來賀運餉十萬由海道至明年二月駐延平三月

大清兵取吉安撫州圍楊廷麟於贛州尚書郭維經出閩募兵援贛六月

大兵克紹興魯王以海遁入海閩中大震芝龍假言海

寇至徹兵回安平鎮航海去守關將士皆隨之仙霞嶺  
空無一人七月何騰蛟遣使迎聿鍵將至韶州唯時我  
兵已抵閩關守浦城御史鄭為虹給事中黃大鵬延平  
知府王士和死焉八月聿鍵出走數日方至汀州

大兵奄至從官奔散與妃曾氏俱就執妃至九瀧投於  
水聿鍵死於福州給事中熊緯尚書曹學佺通政使馬  
思禮等自縊死

郅靖王棟太祖第二十四子洪武二十四年封永樂六

年之藩安陸十二年薨無子封除留內外官校守園王  
妃郭氏武定侯英女王薨踰月妃慟哭曰未亡人無子  
尚誰恃引鏡寫容付宮人曰侯諸女長令識母遂自經  
妃四女一天其三女封光化穀城南漳郡主歲祿各八  
百石宣德四年以郢故邸封梁王瞻埶移郢宮人居南

京

伊厲王樞太祖第二十五子洪武二十一年生生四年  
封永樂六年之藩洛陽歲祿僅二千石王好武不樂居

宮中時時挾彈露劍馳逐郊外奔避不及者手擊之髡  
裸男女以為笑樂十二年薨禮臣請追削封爵不許二  
十二年子簡王顥映始得嗣縱中官擾民洛陽人苦之  
河南知府李驥稍持以法誣奏驥被逮治已而得白罪  
王左右英宗時上表文不恭屢被譙讓天順六年薨世  
孫悼王諱釗嗣成化十一年薨弟定王諱鏐嗣好學崇  
禮居喪哀毀歲時祀先致齋於外郡王諸將軍中尉非  
慶賀不褻見民間高年者禮下之正德三年薨子莊王

訐淵嗣嘉靖五年薨弟敬王訐淳嗣居母喪以孝聞以  
祿薄上言先朝以河南課鈔萬七千七百貫准祿米八  
千石八年革諸王請乞租稅伊府課鈔亦在革中乞補  
祿戶部言課鈔本成弘間請乞非永樂時欽賜比河南  
一省缺祿者八十餘萬宜不許帝從部議二十一年薨  
世子典樸嗣貪而愎多持官吏短長不如指必構之去  
既去復折辱之御史行部過北邙山典樸要笞之搢紳  
往來率紆途取他境經郭外者府中人輒追挽其車詈

其不朝入朝者復辱以非禮府牆壞請更築乃奪取民舍以廣其宮卽中陳大壯與卽鄰索其居不與使數十人從大壯卧起奪其飲食竟至餒死所為宮崇臺連城擬帝闕有錦衣官校之陝者經洛陽典樸忽召官屬迎詔鼓吹擁錦衣入捧一黃卷入宮衆請開讀曰密詔也遂趣錦衣去錦衣謂王厚待之不知所以其夜大張樂至曙府中皆呼千歲詐謂天子特親我也閉河南府城大選名間子女七百餘留其姝麗者九十人不中選者

令以金贖都御史張永明御史林潤給事中邱岳相繼  
言其罪狀再遣使往勘革祿三之二令壞所僭造宮城  
歸民間女執羣小付有司典榭不奉詔部牒促之布政  
使持牒入見典榭曰牒何為者可用障櫺耳四十三年  
二月撫按官以聞詔禮部會三法司議僉謂典榭淫暴  
無藩臣禮陛下曲赦再四終不渝改奸回日甚宜如徽  
王載堦故事禁錮高牆削除世封詔從其議與子褒熾  
俱安置開封

皇子楠太祖第二十六子洪武二十六年生踰月殤

靖江王守謙太祖從孫父丈正南昌王子也當太祖起  
兵時南昌王前死妻王氏攜丈正依太祖太祖高后撫  
如已子比長涉獵傳記饒勇畧隨渡江取集慶路已有  
功授樞密院同僉太祖從容問若欲何官丈正對曰叔  
父成大業何患不富貴爵賞先私親何以服衆太祖喜  
其言益愛之太祖為吳王命為大都督節制中外諸軍  
事及再定江西以洪都重鎮屏翰西南非骨肉重臣莫



能守乃命文正統元帥趙得勝等鎮其地儒士郭之章  
劉仲服為叅謀文正增城浚池招集山寨未附者號令  
明肅遠近震懾居無何友諒帥舟師六十萬圍洪都文  
正數摧其鋒堅守八十有五日城壞復完者數十丈友  
諒旁掠吉安臨江俘其守將徇城下不為動太祖親帥  
兵來援友諒乃解去與太祖相拒於彭蠡友諒掠糧都  
昌文正遣方亮焚其舟糧道絕友諒遂敗復遣何文輝  
等討平未附州縣江西之平文正功居多太祖還京告

廟飲至賜常遇春廖永忠及諸將士金帛甚厚念文正  
前言知大體錫功尚有待也而文正不能無少望性素  
卞急至是暴怒遂失常度任掾吏衛可達奪部中子女  
按察使李飲冰奏其驕侈缺望太祖遣使詰責文正懼  
飲冰益言其有異志太祖即日登舟至城下遣人召之  
文正倉卒出迎太祖數曰汝何為者遂載與俱歸欲竟  
其事高后力解之曰兒特性剛耳無他也免官安置桐  
城未幾卒飲冰亦以他事伏誅文正之被謫也守謙甫

四歲太祖撫其頂曰兒無恐爾父倍訓教貽我憂我終不以爾父故廢爾育之宮中守謙幼名鐵柱吳元年以諸子命名告廟更名煒洪武三年更名守謙封靖江王祿視郡王官屬親王之半命耆儒趙堦為長史傅之既長之藩桂林桂林有元順帝潛邸改為王宮上表謝太祖敕其從臣曰從孫幼而遠鎮西南其善導之守謙知書而好比羣小粵人怨咨召還戒諭之守謙作詩怨望帝怒廢為庶人居鳳陽七年復其爵徙鎮雲南使其妃

弟徐溥同往賜書戒飭語極摯切守謙暴橫如故召還使再居鳳陽復以強取牧馬錮之京師二十五年卒子贊儀幼命為世子三十年春遣省晉燕周楚齊蜀湘代肅遼慶谷秦十三王自湘楚入蜀歷陝西抵河南山西北平東至大寧遼陽還自山東使知親親之義熟山川險易習勞苦贊儀恭慎好學永樂元年復之國桂林使蕭用道為長史用道善輔導贊儀亦敬禮之六年薨諡曰悼僖子莊簡王佐敬嗣初給銀印宣德中改用金塗

正統初與其弟奉國將軍佐敏相訐奏語連大學士楊

榮帝怒戍其使人成化五年薨子相承先卒孫昭和王

規裕嗣弘治二年薨子端懿王約麒嗣以孝謹聞正德

十一年薨子安肅王經扶嗣好學有儉德嘗為敬義箴

嘉靖四年薨子恭惠王邦寧嗣與巡按御史徐南金相

訐奏奪祿米罪其官校隆慶六年薨子康僖王任昌嗣

萬曆十年薨子溫裕王履燾嗣二十年薨無子從父憲

定王任晟嗣三十八年薨子榮穆王履祜嗣薨子亨嘉

嗣李自成陷京師後自稱監國於廣西巡撫瞿式耜奉  
唐王聿鍵命擒送福州聿鍵誅之

典宗五子后常氏生虞懷王雄英吳王允燭呂后生惠  
帝衡王允燧徐王允熿

虞懷王雄英典宗長子太祖嫡長孫也洪武十五年五  
月薨年八歲追加封諡

吳王允燭典宗第三子建文元年封國杭州未之藩成  
祖即位降為廣澤王居漳州未幾召還京廢為庶人錮

鳳陽永樂十五年卒

衡王允燧興宗第四子建文元年封成祖降為懷恩王  
居建昌與允燧俱召還錮鳳陽先後卒

徐王允熿興宗第五子建文元年封成祖降為敷惠王  
隨母呂太后居懿文陵永樂二年下詔改甌寧王奉太  
子祀四年十二月邸中火暴薨諡曰哀簡

惠帝二子俱馬后生

太子文奎建文元年立為皇太子燕師入七歲矣莫知

所終

少子文圭年二歲成祖入幽之中都廣安宮號為建庶人英宗復辟憐庶人無罪久繫欲釋之左右或以為不可帝曰有天命者任自為之大學士李賢贊曰此堯舜之心也遂請於太后命內臣牛玉往出之聽居鳳陽婚娶出入使自便與閹者二十人婢妾十餘人給使令文圭孩提被幽至是年五十七矣未幾卒

成祖四子仁宗漢王高煦趙王高燧俱文皇后生高曦



未詳所生母

漢王高煦成祖第二子性凶悍洪武時召諸王子學於京師高煦不肯學言動輕佻為太祖所惡及太祖崩成祖遣仁宗及高煦入臨京師舅徐輝祖以其無賴密戒之不聽盜輝祖善馬徑渡江馳歸途中輒殺民吏至涿州又擊殺驛丞於是朝臣舉以責燕成祖起兵仁宗居守高煦從嘗為軍鋒白溝河之戰成祖幾為瞿能所及高煦帥精騎數千直前決戰斬能父子於陣及成祖東

昌之敗張玉戰死成祖隻身走適高煦引師至擊退南軍徐輝祖敗燕兵於浦子口高煦引蕃騎來成祖大喜曰吾力疲矣兒當鼓勇再戰高煦麾蕃騎力戰南軍遂却成祖屢瀕於危而轉敗為功者高煦力為多成祖以為類已高煦亦以此自負恃功驕侈多不法成祖即位命將兵往開平備邊時議建儲淇國公邱福駙馬王寧善高煦時時稱高煦功高幾奪嫡成祖卒以元子仁賢且太祖所立而高煦又多過失不果永樂二年仁宗立

為太子封高煦漢王國雲南高煦曰我何罪斥萬里不肯行從成祖巡北京力請並其子歸南京成祖不得已聽之請得天策衛為護衛輒以唐太宗自比已復乘間請益兩護衛所為益恣成祖嘗命同仁宗謁孝陵仁宗體肥重且足疾兩中使掖之行恒失足高煦從後言曰前人蹉跌後人知警時宣宗為皇太孫在後應聲曰更有後人知警也高煦回顧失色高煦長七尺餘輕趨善騎射兩腋若龍鱗者數片既負其雄武又每從北征在

成祖左右時媒孽東宮事譖解縉至死黃淮等皆繫獄  
十三年五月改封青州又不欲行成祖始疑之賜教曰  
既受藩封豈可常居京邸前以雲南遠憚行今封青州  
又託故欲留侍前後殆非實意茲命更不可辭然高煦  
遷延自如私選各衛健士又募兵三千人不隸籍兵部  
縱使劫掠兵馬指揮徐野驢擒治之高煦怒手鐵爪搥  
殺野驢衆莫敢言遂僭用乘輿器物成祖聞之怒十四  
年十月還南京盡得其不法數十事切責之褫冠服囚

繫西華門內將廢為庶人仁宗涕泣力救乃削兩護衛  
誅其左右狎暱諸人明年三月徙封樂安州趣即日行  
高煦至樂安怨望異謀益急仁宗數以書戒不悛成祖  
北征晏駕高煦子瞻圻在北京覘朝廷事馳報一晝夜  
六七行高煦亦日遣人潛伺京師幸有變仁宗知之顧  
益厚遇遺書召至增歲祿賜賚萬計仍命歸藩封其長  
子為世子餘皆郡王先是瞻圻怨父殺其母屢發父過  
惡成祖曰爾父子何忍也至是高煦入朝悉上瞻圻前

後覘報中朝事仁宗名示瞻圻曰汝處父子兄弟間讒  
構至此穉子不足誅遣守鳳陽皇陵未幾仁宗崩宣宗  
自南京奔喪高煦謀伏兵邀於路倉卒不果及帝即位  
賜高煦及趙王視他府特厚高煦日有請並陳利國安  
民四事帝命有司施行仍復書謝之因語羣臣曰皇祖  
嘗諭皇考謂叔有異志宜備之然皇考待之極厚如今  
所言果出於誠則是舊心已革可不順從凡有求請皆  
曲徇其意高煦益自肆宣德元年八月遂反遣其親信

枚青等潛至京師約舊功臣為內應英國公張輔執之以聞時高煦已約山東都指揮靳榮等又散弓刀旂幟於衛所盡奪傍郡縣畜馬立五軍指揮王斌領前軍韋達左軍千戶盛堅右軍知州朱恒後軍諸子各監一軍高煦自將中軍世子瞻坦居守指揮韋弘韋興千戶王玉李智領四哨部署已定偽授王斌朱恒等太師都督尚書等官御史李濬以父喪家居高煦招之不從變姓名間道詣京師上變帝猶不忍加兵遣中官侯泰賜高

煦書奏至高煦盛兵見秦南面坐大言曰永樂中信讒  
削我護衛徙我樂安仁宗徒以金帛餌我我豈能鬱鬱  
居此汝歸報急縛奸臣夏原吉等來徐議我所欲秦懼  
唯唯而已比還帝問漢王何言治兵何如秦皆不敢以  
實對是月高煦遣百戶陳剛進疏更為書與公侯大臣  
多所指斥帝歎曰漢王果反乃議遣陽武侯薛祿將兵  
往討大學士楊榮等勸帝親征帝是之張輔奏曰高煦  
素懦願假臣兵二萬擒獻闕下帝曰卿誠足擒賊顧朕



初即位小人或懷二心不親行不足安反側於是車駕  
發京師過楊村馬上顧從臣曰度高煦計安出或對曰  
必先取濟南為巢窟或對曰彼曩不肯離南京今必引  
兵南下帝曰不然濟南雖近未易攻聞大軍至亦不暇  
攻護衛軍家樂安必內顧不肯徑趨南京高煦外誇詐  
內實怯臨事狐疑不能斷今敢反者輕朕年少新立衆  
心未附不能親征耳今聞朕行已膽落敢出戰乎至即  
擒矣高煦初聞祿等將兵攘臂大喜以為易與及聞親

征始懼時有從樂安來歸者帝厚賞之令還諭其衆仍遺書高煦曰張敖失國始於貫高淮南被誅成於伍被今六師出境王即出倡謀者朕與王除過恩禮如初不然一戰成擒或以王為奇貨縛以來獻悔無及矣前鋒至樂安高煦約詰旦出戰帝令大軍蓐食兼行駐蹕樂安城北壁其四門賊乘城守王師發神機銃箭聲震如雷諸將請即攻城帝不許再敕諭高煦皆不答城中人多欲執獻高煦者高煦大懼乃密遣人詣行幄願假今

夕訣妻子即出歸罪帝許之是夜高煦盡焚兵器及通  
逆謀書明日帝移蹕樂安城南高煦將出城王斌等力  
止曰寧一戰死無為人擒高煦給斌等復入宮遂潛從  
間道出見帝羣臣請正典刑不允以劾章示之高煦頓  
首言臣罪萬萬死惟陛下命帝令高煦為書召諸子餘  
黨悉就擒赦城中罪脇從者不問命薛祿及尚書張本  
鎮撫樂安改曰武定州遂班師廢高煦父子為庶人築  
室西安門內錮之王斌等皆伏誅惟長史李默以嘗諫

免死謫口北為民天津青州滄州山西諸都督指揮約  
舉城應者事覺相繼誅凡六百四十餘人其故縱與藏  
匿生死戍邊者一千五百餘人編邊氓者七百二十人  
帝製東征記以示羣臣高煦及諸子相繼皆死

趙簡王高燧成祖第三子永樂二年封尋命居北京詔  
有司政務皆啓王後行歲時朝京師辭歸太子輒送之  
江東驛高燧恃寵多行不法又與漢王高煦謀奪嫡時  
時譖太子於是太子宫寮多得罪七年帝聞其不法事

大怒誅其長史顧晟褫高燧冠服以太子力解得免擇  
國子司業趙亨道董子莊為長史輔導之高燧稍改行  
二十一年五月帝不豫護衛指揮孟賢等結欽天監官  
王射成及內侍楊慶養子造偽詔謀進毒於帝俟晏駕  
詔從中下廢太子立趙王總旂王瑜姻家高以正者為  
賢等畫謀謀定告瑜瑜上變帝曰豈應有此立捕賢得  
其偽詔賢等皆伏誅陞瑜遼海衛千戶帝顧高燧曰爾  
為之耶高燧大懼不能言太子力為之解曰此下人所

為高燧必不與知自是益斂戢仁宗即位加漢趙二王  
歲祿二萬石明年之國彰德辭常山左右二護衛宣宗  
即位賜田園八十頃帝擒高煦歸至單橋尚書陳山迎  
駕言曰趙王與高煦共謀逆久矣宜移兵彰德擒趙王  
否則趙王反側不自安異日復勞聖慮帝未決時惟楊  
士奇以為不可山復邀尚書蹇義夏原吉共請帝曰先  
帝友愛二叔甚漢王自絕於天朕不敢赦趙王反形未  
著朕不忍負先帝也及高煦至京亦言嘗遣人與趙通

謀戶部主事李儀請削其護衛尚書張本亦以為言帝不聽既而言者益衆明年帝以其詞及羣臣章遣駙馬都尉廣平侯袁容持示高燧高燧大懼乃請還常山中護衛及羣牧所儀衛司官校帝命收其所還護衛而與儀衛司宣德六年薨子惠王瞻塙嗣景泰五年薨子悼王祈鑑嗣天順四年薨子靖王見灞嗣惠王悼王皆頗有過失至見灞惡尤甚屢賊殺人又嘗乘醉欲殺其叔父成化十二年事聞詔奪祿米三之二去冠服戴民巾

讀書習禮其後二年見潯母妃李氏為之請得冠服如  
故見潯卒不能改愛幼子祐枳遂誣長子祐採以大逆  
復被詔誚讓弘治十五年薨子莊王祐採嗣正德十三  
年薨子康王厚煜嗣事祖母楊妃以孝聞嘉靖七年六  
月璽書褒予明年冬境內大饑厚煜上疏請辭祿一千  
石以佐振帝嘉王憂國詔有司發粟不允所辭及帝南  
巡厚煜遠出迎命益祿三百石厚煜性和厚構一樓名  
思訓嘗獨居讀書文藻瞻麗宗人輔國將軍祐棕等數



犯法與有司為難厚煜庇祐掠祐掠卒得罪並見責讓  
其後有司益務以事裁抑諸宗洛川王翊銘奴與通判  
田時雨之隸爭瓜而毆時雨捕王奴厚煜請解不得竟  
論奴充軍未幾宗室數十人索祿時雨以宗室毆府官  
白於上官知府傅汝礪盡捕各府人厚煜由是忿恚竟  
自縊死三十九年十月也厚煜子成皋王載浣疏聞於  
朝下法司按問時雨斬河南市汝礪戍極邊厚煜子載  
培及載培子翊錨皆前卒翊錨子穆王常清嗣以善行

見旌萬厯四十二年薨世子由松前卒弟壽光王由桂  
子慈憚嗣薨無子穆王弟常洵嗣崇禎十七年彰德陷  
被執

高熾成祖第四子未及封卒

明史卷一百十八

欽定四庫全書

明史卷一百十八考證

岷莊王傳子憲王定燿嗣三十四年薨曾孫禋洪天啓  
二年嗣崇禎元年薨無子從父企鏜嗣

臣嚴福按

諸王世表定燿薨後以南充王幹跬為世子未立而  
卒諡僖靖孫企鈐亦卒乃以禋洪嗣企鏜者幹跬子  
企鈐弟也

谷王德傳又致書蜀王為隱語

臣

嚴福按明實錄棗

致蜀王書有曰德蒼時不可言桓文之事桓文時不可言德蒼之施即所謂隱語也

於時及二子皆廢為庶人

臣嚴福按何喬遠分藩記

云棹是時闔戶自焚死與傳異鄭曉同姓諸王傳謂是時廢其二子賦灼賦爚為庶人

藩簡王傳就藩潞州

臣嚴福按鄭曉同姓諸王傳宣

宗時模言諸子婚請展府垣外盡民廬也上曰毀民廬以拓王府不可命工部往勘之

皇子楠傳之藩桂林

臣嚴福按明實錄守謙之藩桂

林在洪武九年

與允燭俱召還錮鳳陽

臣嚴福按鄭曉同姓諸王傳

允燭允煜之廢也帝以其不能諫正惠帝罪之

時時稱高煦功幾奪嫡

臣嚴福按鄭曉同姓諸王傳

福等時稱高煦功高成祖曰居守功高於扈從儲貳  
分定於嫡長汝等勿復妄言

明史卷一百十八考證